



李太白集 三

柳田文庫

文庫11

D 125

3



文庫 11
D 125
3

柳田家藏

010190553073

李太白文集卷第十四

歌詩三十五首

送上

南陽送客 楚漢

斗酒勿與薄寸心貴不忘坐惜故人去偏令遊子傷
離顏怨芳草春思結垂楊揮手再三別臨岐空斷腸

送張舍人之江東 淮南

張翰江東去正值秋風時天清一作晴一鴈遠海闊孤

帆遲白日行欲暮滄波杳難期一作白行已晚欲暮杳難期吳洲

好一作如見月千里幸相思

送玉屋山人魏萬還玉屋 魏詩附



王屋山人魏萬去自嵩宋公吳相送數千里不遇乘

興遊台越經永嘉觀謝公石門後於廣陵相見美其

愛文好古浪跡方外因述其行而贈是詩一作見王

去自嵩歷充遊梁入吳計程三千里相訪不遇因下

江東尋諸名山往復百越後於廣陵一面遂乘輿共

物表因述其行李遂有此贈

仙人東方生浩蕩弄雲海沛然乘天遊獨往失所在

一作東方不辭家獨訪紫泥魏侯繼大名本家聊攝

筆如振綺辯折田巴生心齊魯連子西涉清洛源頗

驚人世誼採秀卧王屋因窺洞天門謁來遊嵩峯羽

容何雙雙朝攜月光子暮宿玉女牕鬼谷上窈窕龍

潭下奔淥東浮汴河水訪我三千里逸興滿吳雲飄

飄浙江汜揮手杭越間樟亭望潮還濤卷海門石雪

橫天際山白馬走素車雷奔駭心顏遙聞會稽美一

弄且度耶谿水萬壑與千巖崢嶸鏡湖裏秀色不可

名清輝滿江城人遊月邊去舟在空中行此中久延

佇入剡尋王許笑讀曹娥碑沉吟黃絹語天台連四

明日入向國清五峯轉月色百里行松聲靈溪恣公

越華頂殊超忽石梁橫青天側足履半月眷一作然

思永嘉不憚海路賒挂席歷海嶠迴瞻赤城霞赤城

漸微沒孤嶼前曉兀水續萬古流亭空千霜月縉雲

川谷難石門最可觀瀑布挂北斗莫窮此水端噴壁

灑素雪空濛生晝寒却尋惡溪去寧懼惡溪咆哮

七十灘水石相噴薄路創李北海李公邕昔為括州開此嶺路巖

開謝康樂惡溪有謝康樂詩題處一作嶺路始北海巖詩題康樂松風和猿聲

搜索連洞壑徑出岸一作岸接梅花橋雙溪紉歸潮落帆金

華岸赤松若可招沈約八詠樓城西孤岩峩峩岩峩四

荒外曠望羣川會雲卷天地開波連浙西大亂流新

安口北指嚴光瀨釣臺碧雲中邈與蒼梧對稍稍來

吳都徘徊上姑蘇煙絲橫九疑湊蕩一作湊見五湖目

極心更遠悲歌但長吁迴繞楚江濱揮策揚子津身

著日本裘表則朝御所贈日本布為之昂藏出風塵五月造我語

知非僂儂人相逢樂無限水石日在眼徒干五諸侯

不致百金產吾友揚子雲絃歌播清芬雖為江寧宰

好與山公羣乘興但一行且知我愛君君來幾何時

仙臺應有期東窓綠玉樹定長三五枝一作今天壇

人當笑爾歸遲我苦惜遠別茫然使心悲 黃河

若不斷白首長相思

金陵訓翰林謫仙子

玉屋山人魏萬

君抱碧海珠我懷藍田玉各稱希代寶萬里遙相燭

長卿慕蘭父子猷意已深平生風雲人暗合江海心

去秋忽乘輿命駕來東土謫仙遊梁園愛子在鄒魯

二處一不見拂衣向江東五兩挂淮月扁舟隨海風

南遊吳越徧高揖二千石雪上天台山春逢翰林伯
宣父敬項託林宗重黃生一長復一少相看如弟兄
惕然意不盡更逐西南去同舟入秦淮建業龍盤處
楚歌對吳酒借問承恩初官買長門賦天迎駟馬車
才高世難容道廢可推命安石重携妓子房空謝病
金陵百萬戶六代帝王都虎踞西江鍾山臨北湖
湖山信為美王屋人相待應為岐路多不知歲寒在
君遊早晚還勿久風塵間此別未遠別秋期到仙山

送當塗趙少府赴長蘆

我來揚都市送客迴輕舸因誇吳太子便覩廣陵濤
仙尉趙家玉英風凌四豪維舟至長蘆目送煙雲高
搖扇對酒樓持袂把蟹螯前途儻相思登嶽一長謠

送友人尋越中山水

聞道稽山去徧宜謝客才千巖泉灑落萬壑樹縈迴
東海橫秦望西陵遶越臺湖清霜鏡曉濤白雪山來
八月枚乘筆三吳張翰盃此中多逸興早晚向天台
送族弟凝之滁求婚崔氏

與爾情不淺忘筮已得魚玉臺挂寶鏡持此意何如
坦腹東牀下由來志氣踈遙知向前路擲果定盈車
送友人遊梅湖

送君遊梅湖應見梅花發有使寄我來無令紅芳歇
暫行新林浦定醉金陵月莫惜一鴈書音塵坐胡越

送崔十二遊天竺寺

還聞天竺寺夢想懷東越每年海樹霜桂子落秋月
送君遊此地已屬流芳歇待我來歲行相隨浮溟渤

送楊山人歸天台

客有思天台東行路超忽濤落浙江秋沙明浦陽月
今遊方厭楚昨夢先歸越且盡秉燭歡無辭凌晨發
我家小阮賢剖竹赤城邊詩人多見重官燭未曾然
興引登山屐情催汎海舩石橋如可度攜手弄雲煙

送溫處士歸黃山白鵝峯舊居

黃山四千仞三十二蓮峯丹崖夾石柱菡萏金芙蓉
伊昔昇絕頂下窺天目松仙人鍊玉處羽化留餘蹤
亦聞溫伯雪一作雲獨往今相逢採秀辭五嶽攀巖歷萬
重歸休白鵝嶺渴飲丹沙井鳳吹我時來雲車爾當
整去去陵陽東行行芳桂叢迴谿十六度碧嶂盡晴
空他日還相訪乘橋躡綵虹

送方士趙叟之東平

長桑晚洞視五藏無全牛趙叟得祕訣還從方士遊
西過獲麟臺為我弔孔丘念別復懷古潛然空淚流

送韓準裴政一作孔巢父還山魯中

獵客張兔置不能挂龍虎所以青雲人高歌一作在巖
戶韓生信英一作豪彥裴子含清真孔侯復秀出俱與雲
霞親峻節凌遠松同衾卧盤石斧冰漱寒泉三子同

傳一作二屐時時或乘興徃徃一作去云無心出山揖牧伯長
嘯輕衣簪昨宵夢裏還云弄竹溪月今晨魯東門帳
飲與君別雪崖滑去馬蘿逕迷歸人相思若煙草歷
亂無冬春

送楊少府赴選

大國置衡鏡準平天地心羣賢無邪人即墮窮清深
吾君詠南風袞冕彈鳴琴時泰多美士京國會纓簪
山苗落澗底幽松出高岑夫子有盛才主司得球琳
流水非鄭曲前行遇知音衣工剪綺繡一悞傷千金
何惜刀尺餘不裁寒女衾我非彈冠者感別但開襟
空谷無白駒賢人豈悲吟大道安弃物時來或招尋

爾見山吏部當應無陸沉

對雪奉餞任城六父秩滿歸京

龍虎謝鞭策駕鸞不司晨君看海上鶴何似籠中鷄
獨用天地心浮雲乃吾身雖將簪組狎若與煙霞親
季父有英風白眉超常倫一官即夢寐脫屣歸西秦
竇公敞華筵墨客盡來臻燕歌落胡鴈郢曲迴陽春
征馬百度嘶遊車動行塵躊躇未忍去戀此四座人
餞離駐高駕惜別空慙慙何時竹林下更與步兵鄰
魯郡堯祠送吳五之琅琊

堯沒三千歲青松古廟存送行奠桂酒拜舞清心魂
日色促歸人連歌倒芳樽馬嘶俱醉起分首更何言

魯郡堯祠送竇明府薄華還西京

時久病初起

朝策犁眉騮舉鞭力不堪強扶愁疾向何處角巾微

服一作步堯祠南長楊掃地不見日石門噴作金沙潭笑

誇故人一作笑指絕境山光水色青於藍廟中往往來

擊鼓堯本無心爾何苦門前長跪雙石人有女如花

日歌舞銀鞭繡轂往復迴簸林蹶石鳴風雷遠煙空

翠時明滅白鷗歷亂長飛雪紅泥亭子赤一作朱欄干碧

流環轉青錦湍深沉百丈洞海底那知不有蛟龍盤

君不見綠珠潭水流東海綠珠紅粉沉光彩一作白首

彩綠珠樓下花滿園今日曾無一枝在昨夜秋聲聞

闔來洞庭木落騷人哀遂將三五少年輩登高送遠

遠望形神開生前一笑輕九鼎魏武何悲銅雀臺我歌

白雲倚牕牖一作大爾聞其聲但揮手長風吹月渡海

來遙勸仙人一杯酒酒中樂酣宵向分舉觴醉堯堯

可聞何不令臯繇一作擁篲橫八極直上青天揮一作掃浮

雲高陽小飲真瑣瑣山公酩酊何如我竹林七子去

道賒蘭亭雄筆安足誇堯祠笑殺五鏡湖一作水至今惟

悴空荷花爾向西秦我東越暫向瀛洲訪金闕藍田

太白若可期為余掃灑石上月

金鄉送韋八之西京

客自長安來還歸長安去狂一作秋風吹我心西挂咸陽

樹此情不可道一作論此別何時遇望望不見君連山起

煙霧

送薛九被讒去魯

宋人不辨玉魯賤東家丘我笑薛夫子一作而我胡為
 兩地遊黃金消衆口白璧竟難投梧桐生蒺藜綠竹
 乏佳實鳳凰宿誰家遂與羣雞匹田一作家養老馬窮
 士歸其門蛾眉笑蹙者賓客去平原却斬美人首三
 千還駿奔毛公一挺劍楚趙兩相存孟嘗習一作狡兔
 三窟賴馮諼信陵奪兵符為用侯生言一作朱生擊
 黥春申一何愚刎首為李園賢哉四公子撫掌黃泉
 裏借問笑何人笑人不好士爾去且勿誼一作論桃花竟
 何言沙丘無漂母誰肯飯王孫

單父東樓秋夜送族弟況之秦一作西京時疑弟在

席

爾從咸陽來問我何勞苦沐猴而冠不足言身騎土
 牛滯東魯況弟欲行疑弟留孤飛一鴈秦雲秋坐來
 黃葉落四五北斗已一作挂西城樓絲桐感人絃亦一作
 絕滿堂送客皆惜別卷簾見月清興來疑是山陰夜
 中雪明日斗酒別惆悵清路塵遙望長安日不見長
 安人長安宮闕九天上此地曾經為近臣一朝復一
 朝白髮心不改屈平顛賴滯江潭亭伯流離放遼海
 折翮翻飛隨轉蓬一作翼短天聞弦虛墜下霜空聖
 朝久棄青雲士他日誰憐張長公一作誰肯相

送族弟凝至晏堦單父三十里

雪滿原野白戎裝出盤遊揮鞭布獵騎四顧登高丘
克起馬足間蒼鷹下平疇喧呼相馳逐取樂銷人憂
捨此戒禽荒徵聲列齊謳鳴鷄發晏堦別鴈驚涑溝
西行有東音寄與長河流

魯城北郭曲署桑下送張子還嵩陽

送別枯桑下凋葉落半空我行憊道遠爾獨知天風
誰念張仲蔚還依蒿與蓬何時一盃酒更與李膺同

送魯郡劉長史遷弘農長史

魯國一杯水難容橫海鱗仲尼且不斂況乃尋常人
白玉換斗粟黃金買尺薪閑門木葉下始覺秋非春

聞君向西遷地即鼎湖鄰寶鏡匣蒼蘚丹經理素塵
軒后上天時攀龍遺一作小臣及此留惠愛庶幾風化
淳魯縞如白煙五緜不成束臨行贈貧交一尺重山
岳相國齊晏子贈行不及言託陰當樹李忘憂當樹
萱他日見張祿綈袍懷舊恩

送族弟單父主簿凝攝宋城主簿至郭南月
橋却迴棲霞山留飲贈之

吾家青萍劍操割有餘閑往來糾二邑此去何時還
鞍馬月橋南光輝岐路間賢豪相追餞却到棲霞山
羣花散芳園斗酒開離顏樂酣相顧起征馬無由攀

魯郡東石門送杜二甫

醉別復幾日登臨徧池臺何言石門路一作重有金樽
開秋波落泗水海色明徂來飛蓬各自遠且盡林中
盃

魯郡堯祠送張十四遊河北

猛虎伏尺草雖藏難蔽身有如張公子骯髒在風塵
豈無橫腰劍屈彼淮陰人擊筑向北燕燕歌易水濱
歸來太山上當與爾為鄰

杭州送裴大澤時赴廬州長史 吳中

西江天柱遠東越海門深去割辭親戀行憂報國心
好風吹落日流水引長吟五月披裘者應知不取金
灞陵行送別 長安

送君灞陵亭灞水流浩浩上有無花之古樹下有傷
心之春草我向秦人問路岐云是王粲南登之古道
古道連緜走西京紫關落日浮雲生正當今夕斷腸
處驪歌愁絕不忍聽

送賀監歸四明應制

久辭榮祿遂初衣曾向長生說息機真訣自從茅氏
得恩波寧阻洞庭歸瑤臺含霧星辰滿仙嶠浮空島
嶼微借問候棲珠樹鶴何年却向帝城飛

送竇司馬貶宜春

天馬白銀鞍親承明主歡鬪雞金宮一作閨裏射鴈碧雲
端堂上羅巾貴歌鍾清夜闌何言謫南國拂劍坐長

歎趙璧為誰點，隨珠枉被彈。聖朝多雨露，莫厭此行難。

送羽林陶將軍

將軍出使擁樓船，江上旌旗拂紫煙。萬里橫戈探虎穴，三杯拔劍舞龍泉。莫道詞人無膽氣，臨行將贈繞朝鞭。

送程劉二侍御兼獨孤判官赴安西幕府

安西幕府多才雄，喧喧唯道三數公。繡衣貂裘明積雪，飛書走檄如飄風。朝辭明主出紫宮，銀鞍送別金城空。天外飛霜下葱海，火旗雲馬生光彩。胡塞塵清計日歸，漢家草綠遙相待。

送姪良攜二妓赴會稽戲有此贈

攜妓東山去，春光半道催。遙看二桃李，雙入鏡中開。

送賀賓客歸越

鏡湖流水漾清波，一作春始波狂客歸舟逸興多。山陰道士如相見，應寫黃庭換白鵝。

送張遙之壽陽幕府

壽陽信天險，天險橫荆關。苻堅百萬眾，遙阻八公山。不假築長城，大賢在其間。戰夫若熊虎，破敵有餘閑。張子勇且英，少輕衛霍孱。投軀紫髯將，千里望風顏。勛爾効才略，功成衣錦還。

李太白文集卷第十四

吳門繆晷武子甫重刊宋本

李太白文集卷第十五

歌詩四十八首

送中

送裴十八圖南歸嵩山二首

何處可為別長安青綺門胡姬招素手一作留客醉金樽臨當上馬時我獨一作因與君言風吹一作驚芳蘭折日沒鳥雀喧舉手拍飛鴻此情難具論同歸無早晚有清源穎水

君思穎水綠忽復歸嵩岑歸時莫洗耳為我洗其心洗心得真情洗耳徒買名謝公終一起相與濟蒼生

同王昌齡送族弟襄歸桂陽二首一作同王昌齡

秦地見碧草楚謠對清樽把酒爾何思鷓鴣啼南園
余欲羅浮隱猶懷明主恩躊躇紫宮戀孤負滄洲言
終然無心雲海上同飛翻相期乃不淺幽桂有芳根
爾家何在瀟湘川青莎白石長江邊昨夢江花照江
日幾枝正發東總前覺來欲往心悠然魂隨越鳥飛
南天秦雲連山海相接桂水橫煙不可涉送君此去
令人愁風帆茫茫隔河洲春潭瓊草綠可折西寄長
安明月樓

送外甥鄭灌從軍三首

六博爭雄好彩來金盤一擲萬人開丈夫賭命報天

子當斬胡頭衣錦迴

丈人蛇矛出隴西彎弧拂箭白猿啼破胡必用龍韜
策積甲應將熊耳齊

月蝕西方破敵時及瓜歸日未應遲斬胡血變黃河
水梟首當懸白鵠旗

送于十八應四子舉落第還嵩山

吾祖吹橐籥天人信森羅歸根復大素羣動熙元和
炎炎四真人摛辯若濤波交流無時寂楊墨日成科
夫子聞洛誦誇才才故多為金好踊躍久客方蹉跎
道可東賣之五寶溢山河勸君還嵩丘開酌眄庭柯
三花如未落乘興一來過

送別

尋陽五溪水，汭洄直入巫山裏。勝境由來人共傳，君到南中自稱美。送君別有八月秋，颯颯蘆花復益愁。雲帆望遠不相見，日暮長江空自流。

送族弟綰一作瑄從軍安西

漢家兵馬乘北風，鼓行而一作向西破犬戎。爾隨漢將一作長劍出門去，剪虜若草收。奇功君玉按劍望邊色，旄頭已落胡天空。匈奴繫頸數應盡，明年應一作驅入蒲桃宮。

送梁公昌從信安王北征

入幕推英選，捐書事遠戎。高談百戰術，鬱一作鬱作萬夫雄。

起舞蓮華劍，行歌明月宮。將飛天地陣，兵出塞垣通。祖席留丹景，征麾拂綵虹。旋應獻凱入，麟閣佇深功。

送白利從金吾董將軍西征長安

西羌延國討，白起佐軍威。劍決浮雲氣，弓彎明月輝。馬行邊草綠，旌卷曙霜飛。抗手凜相顧，寒風生鐵衣。

送張秀才從軍

六駮食猛武，取從駑馬羣。一朝長鳴去，矯若龍行雲。壯士懷遠略，志存解世紛。周粟猶不顧，齊珪安肯分。抱劍辭高堂，將投霍冠軍。長策掃河洛，寧親歸汝墳。當令千古後，麟閣著奇勳。

送崔度還吳度故人禮部員外國輔之子燕

幽燕沙雪地萬里盡黃雲朝吹歸秋鴈南飛日幾羣
中有孤鳳鷄哀鳴九天聞我乃重此鳥綵章五色分
胡為雜凡禽雞鶩輕賤君舉手捧爾足疾心若火焚
拂羽淚滿面送之吳江濱去影忽不見躊躇日將曛

送祝八之江東賦得浣紗石

峽西

西施越溪女明豔光雲海未一作來入吳王宮殿時浣紗
古石一作石今猶在桃李新開映古一作杏查菖蒲猶短出平
沙昔時紅粉照流水今日青苔覆落花君去西秦適
東越碧山清江幾超忽若到天涯思故人浣紗石上
窺明月

送侯十一梁宋

朱亥已擊晉侯嬴尚隱身時無魏公子豈貴抱關人
余亦不火食遊梁同在陳空餘湛盧劍贈爾託交親
魯中送二從弟赴舉之西京

再至魯中一作送族弟鏗

魯客向西笑君門若夢中霜凋逐臣髮日憶明光宮
復羨二龍去才華冠世雄平衢騁高足逸翰凌長風
舞袖拂秋月歌筵聞早鴻送君日千里良會何由同
奉餞高尊師如貴道士傳道錄畢歸北海齊州
道隱不可見靈書藏洞天吾師四萬劫歷世遞相傳
別杖留青竹行歌躡紫煙離心無遠近長在玉京懸

金陵送張十一再遊東吳

金陵

張翰黃花句風流五百年誰人今繼作夫子世稱賢

再動遊吳棹還浮入海舩春光白門柳霞色赤城天
去國難為別思歸各未旋空餘賈生淚相顧共悽然

送紀秀才遊越

海水不滿眼觀濤難稱心即知蓬萊石却是巨鼇簪
送爾遊華頂令余發舄吟仙人居射的道士住山陰
禹穴尋溪入雲門隔嶺深綠蘿秋月夜相憶在鳴琴

送長沙陳太守二首

長沙陳太守逸氣凌青松英主賜玉馬本是天池龍
湘水迴九曲衡山望五峯榮君按節去不及一作得遠相
從

七郡長沙國南連湘水濱定王垂舞袖地窄不迴身

莫小二千石當安遠俗人洞庭鄉路遠遙羨錦衣春

送楊燕之東魯

關西楊伯起漢日舊稱賢四代三公族清風播人天
夫子華陰居開門對玉蓮何事歷衡霍雲帆今始還
君坐稍解顏為我一作君歌此篇我固侯門士謬登聖主
筵一辭金華殿蹭蹬長江邊二子魯門東別來已經
年因君此中去不覺淚如泉

送蔡山人

我本不棄世世人自棄我一乘無倪舟八極縱遠施
燕客期躍馬唐生安敢譏採珠勿驚龍大道可暗歸
故山有松月遲爾翫清暉

送蕭三十一之魯中兼問稚子伯禽

六月南風吹白沙吳牛喘月氣成霞水國鬱鬱一作敲蒸不
可處時炎道遠無行車夫子如何涉江路雲帆娟娟
金陵去高堂倚門望伯魚魯中正是趨庭處我家寄
在沙丘傍三年不歸空斷腸君行既識伯禽子應駕
小車騎白羊

送楊山人歸嵩山

我有萬古宅嵩陽玉女峯長留一片月挂在東溪松
爾去掇仙草昌蒲花紫茸一作君行到此峯殘霞駐衰容歲晚或相訪
青天騎白龍

送郝淑三首

海水不可解連江夜為潮俄然浦嶼闊岸去酒船遙
惜別耐取醉鳴榔且長謠天明爾當去應有便風飄
白鷺洲前月天明送客迴青龍山後日早出海雲來
流水無情去征帆逐吹開相看不忍別更進手中盃
痛飲龍筇下燈青月復寒醉歌驚白鷺半夜起沙灘

送岑徵君歸鳴臯山

岑公相門子雅望歸安石弈世皆夔龍中台竟一作三
拆至人達機兆高揖九州伯奈何天地間而作隱淪
客貴道一作能全真潛輝卧幽鄰一作鱗探元入窅默觀化
遊無垠光武有天下嚴陵為故人雖登洛陽殿不屈
巢由身余亦謝明主今稱偃蹇臣登高覽萬古思與

廣成鄰蹈海寧受賞還山非問津西來一作終期一搖扇
共拂元規塵

送范山人歸太山

魯客抱白雞一作鶴別余往太山初行若片雪一作雲杳在青
崖間高高至天門海日一作日觀近可攀雲生望不及此去
何時還

送韓侍御之廣德令

昔日繡衣何足榮今宵貫酒與君傾暫就東山賒月
色酣歌一夜送泉明

白雲歌送友人

楚山秦山多白雲白雲處處長隨君君今還入楚山
裏雲亦隨君渡湘水水上女蘿衣白雲早卧早行君
早起

送通禪師還南陵隱靜寺

我聞隱靜寺山水多奇蹤巖種朗公橋門深盃渡松
道人制猛虎振錫還孤峯他日南陵下相期谷口逢

送友人

青山橫北郭白水遶東城此地一為別孤蓬萬里征
浮雲遊子意落日故人情揮手自茲去蕭蕭班馬鳴

送別

斗酒渭城邊鑪頭醉不眠梨花千樹雪楊葉萬條煙
惜別傾壺醕臨分贈馬鞭看君頽上去新月到家圓

江上送女道士褚三清遊南岳

吳江女道士頭戴蓮花巾霓裳不濕雨特異陽臺神
足下遠遊履凌波生素塵尋僊向南岳應見魏夫人

送友人入蜀

見說蠶叢路崎嶇不易行山從人面起雲傍馬頭生
芳樹籠秦棧春流遶蜀城升沉應已定不必訪君平

送趙雲卿

白玉一杯酒綠楊三月時春風餘幾日兩鬢各成絲
秉燭唯須飲投竿也未遲如逢渭川獵猶可帝王師

送李青歸華陽川

伯陽僊家子容色如青春日月祕靈洞雲霞辭世人

化心養精魄隱几窅天真莫作千年別歸來城郭新

送舍弟

吾家白額駒遠別臨東道他日相思一夢君應得池
塘生春草

送別 得書字

水色南天遠舟行若在虛遷人發佳興吾子訪閑居
日落看歸鳥潭澄憐一深躍魚聖朝思賈誼應降紫泥
書

送麴十少府

試發清秋興因爲吳會吟碧雲斂海色流水折江心
我有延陵劍君無陸賈金艱難此爲別惆悵一何深

送張秀才謁高中丞并序

余時繫尋陽獄中正讀留侯傳秀才張孟熊蘊滅胡
之策將之廣陵謁高中丞余喜子房之風感激於斯
人因作是詩以送之

秦帝淪玉鏡一作六雄
滅金虎留侯降氛氲感激黃石老經過

滄海君壯士揮金槌報讎六合聞智勇冠終古蕭陳

難與羣兩龍爭鬪時天地動風雲酒酣一作
縱橫舞長劍倉

卒解漢紛宇宙初倒懸洪溝勢將分英謀信奇絕夫

子揚清芬一作夫子稱卓
絕超然繼清芬胡月入紫微三光亂天文高

公鎮淮海談笑廓妖氛採爾幕中畫戡難光殊勲我

無燕霜感玉石俱燒焚但灑一行淚臨歧竟何云

尋陽送弟昌岨鄱陽司馬作

桑落洲渚連滄江無雲烟尋陽非剡水忽見子猷船

了見欲相近來遲杳若仙人乘海上月帆落湖中天

一覩無二諾朝權更勝昨爾則吾惠連吾非爾康樂

朱紱白銀章上官佐鄱陽松門拂中道石鏡迴清光

搖扇及干越水亭風氣涼與爾期此亭期在秋月滿

時過或未來兩鄉心已斷吳山對楚岸彭蠡當中州

相思定如此有窮盡年愁

錢校書叔雲

少年費白日歌笑矜朱顏不知忽已老喜見春風還

惜別且為懽徘徊桃李間看花飲美酒聽鳥臨晴山

向晚竹林寂無人空閉關

送王孝廉覲省 廬江

彭蠡將天合姑蘇在日邊寧親候海色欲動孝廉舩
窈窕晴江轉參差遠岫連相思無晝夜東注似長川

同吳王送杜秀芝舉入京

秀才何翩翩王許回也賢暫別廬江守將遊京兆天
秋山宜落日秀木出寒煙欲折一枝桂還來鴈沼前

李太白文集卷第十五

吳門繆晷武子甫重刊宋本

李太白文集卷第十六

歌詩三十八首

送下

洞庭醉後送絳州呂使君杲流澧州 江夏

昔別若夢中天涯忽相逢洞庭破秋月縱酒開愁容
贈劍刻玉字延平兩蛟龍送君不盡意書及鴈迴峯

與諸公送陳郎將歸衡陽 并序

仲尼旅人文王明夷苟非其時聖賢低眉況僕之不
肖者而遷逐枯槁固非其宜朝心不開暮髮盡白而
登高送遠使人增愁陳郎將義風凜然英思逸發來
下曹城之榻去邀才子之詩動清興於中流泛素波

而徑去諸公仰望不及連章祖之序慙起予輒冠名賢之首作者嗤我乃為撫掌之資乎

衡山蒼蒼入紫冥下看南極老人星迴飈吹散五峯雪往往飛花落洞庭氣清嶽秀有如此郎將一家拖金紫門前食客亂浮雲世人皆比孟嘗君江上送行無白壁臨岐惆悵若為分

江夏送倩公歸漢東 并序

謝安四十卧白雲於東山桓公累徵為蒼生而一起常與支公遊賞貴而不移大人君子神冥契合正可乃爾僕與倩公一面不忝古人言歸漢東使我心痲夫漢東之國聖人所出神農之後季良為大賢爾來寂

寞無一物可紀有唐中興始生紫陽先生先生六十而隱化若繼跡而起者惟倩公焉蓄壯志而未就期老成於他日且能傾產重諾好賢攻文即惠休上人與江鮑往復各一時也僕平生述作罄其草而授之思親遂行流涕惜別今聖朝已捨季布當徵賈生開顏洗目一見白日冀相視而笑於新松之山耶作小詩絕句以寫別李白辭

路入漢東國川藏明月輝寧知喪亂後更有一珠歸

送趙判官赴黔府中丞叔幕

廓落青雲心結交黃金盡富貴翻相忘令人忽自哂
蹭蹬鬚毛斑盛時難再還巨源咄石生何事馬蹄間

李十六
綠蘿長不厭却欲還東山君爲魯曾子拜揖高堂裏
叔繼趙平原偏承明主恩風霜推一作催獨坐旌節鎮雄
藩虎士秉金鉞蛾眉開玉樽才高幕下去義重林中
言水宿五溪月霜啼三峽猿東風春草綠江上候歸
軒

送陸判官往琵琶峽

水國秋風夜殊非遠別時長安如夢裏何日是歸期

送梁四歸東平

玉壺挈美酒送別強爲歡大火南星月長郊北路難
殷王期負鼎汶水起垂竿莫學東山卧參差老謝安

江夏送友人

雪點翠雲裘送君黃鶴樓黃鶴振玉羽西飛帝王州
鳳無琅玕寶何以贈遠遊徘徊相顧影淚下漢江流

送郝昂謫巴中

瑤草寒不死移植滄江濱東風灑雨露會入天地一作池
春予若洞庭葉隨波送逐臣思歸未可得書此謝情人

江夏送張丞

欲別心不忍臨行情更親酒傾無限月客醉幾重春
藉草依流水攀花贈遠人送君從此去迴首泣迷津
賦得白鷺斯送宋少府入三峽

白鷺拳一足月明秋水寒人驚遠飛去直向使君灘

送二季之江東

初發強中作題詩與惠連多慙一日長不及二龍賢
西塞當中路南風欲進船雲峯出遠海帆影挂清川
禹穴藏書地匡山種杏田此行俱有適遲爾早歸旋

江西送友人之羅浮

南昌

桂水分五嶺衡山朝九疑鄉關眇安西流浪將何之
素色愁明湖秋渚晦寒姿疇昔紫芳意已過黃髮期
君王縱疎散雲壑借巢夷爾去之羅浮我還憩峨眉
中闊道萬里霞月遙相思如尋楚狂子瓊樹有芳枝

宣州謝朓樓餞別校書叔雲

一作陪侍御叔華登樓歌

棄我去者昨日之日不可留亂我心者今日之日多
煩憂長風萬里送秋鴈對此可以酣高樓蓬萊文章

建安骨中間小謝又清發俱懷逸興壯思飛欲上青

天

一作覽明月抽刀斷水水更流舉杯消愁愁更愁

人生

一作男兒在世不稱意明朝散髮弄扁舟

一作舉棹還滄洲

宣城送劉副使入秦

君即劉越石雄豪冠當時淒清橫吹曲慷慨扶風詞
虎嘯俟騰躍鷄鳴遭亂離千金市駿馬萬里逐王師
結交樓煩將侍從羽林兒統兵捍吳越豺虎不敢窺
大勲竟莫敘已過秋風吹秉鉞有季公凜然負英姿
寄深且戎幕望重必台司感激一然諾縱橫兩無疑
伏奏歸北闕鳴騶忽西馳列將咸出祖英寮惜分離
斗酒滿四筵歌笑宛溪湄君攜東山妓我詠北門詩

貴賤交不易恐傷中國葵昔贈紫騮駒今傾白玉卮
同驩萬斛酒未足解相思此別又千里一作此外秦吳
眇天涯月明關山苦水劇隴頭悲借問幾時還春風
入黃池無令長相思折斷綠楊枝

涇川送族弟錚

錚時盧校書草序常侍御為詩

涇川三百里若耶羞見之錦石照碧山兩邊白鷺鷥
佳境千萬曲客行無歇時上有琴高水下有陵陽祠
仙人不見我明月空相知問我何事來盧敖結幽期
蓬山振雄筆繡服揮清詞江湖發秀色草木含榮滋
置酒送惠連吾家稱白眉愧無海嶠作敢闕河梁詩
見爾復幾朝俄然告將離中流漾綵鷁列岸叢金羈

歎息蒼梧鳳分棲瓊樹枝清晨各飛去飄落天南垂
望極落日盡秋深暝猿悲寄情與流水但有長相思

五松山送殷淑

秀色發江左風流奈若何仲文了不還獨立揚清波
載酒五松山頽然白雲歌中天度落月萬里遙相過
撫酒惜此月流光畏蹉跎明日別離去連峯鬱嵒我

送崔氏昆季之金陵

一作秋夜崔氏文水亭送崔氏

放一作吳歌倚東樓行子期曉發秋風渡江來吹落山上
月主人出美酒滅燭延清光二崔向金陵安得不盡
觴水客弄歸棹雲帆卷輕霜扁舟帶亭下五兩先飄
揚峽石入水花碧流日更長思君無歲月西笑阻河

梁

登黄山陵敲臺送族弟溧陽尉濟充一作統汎舟

赴華陰當塗

鸞乃鳳之族翱翔紫雲霓文章輝一作耀五色雙在瓊樹
棲一朝各飛去鳳與鸞俱啼炎赫五月中朱曦爍河
堤爾從汎舟役使我心魂悽秦地無草木南雲喧鼓
鼙君王減玉膳早起思鳴鷄漕引救關輔疲人免塗
泥宰相作霖雨農夫得耕犁靜者伏草間羣才滿金
闈空手無壯士窮居使人低送君登黄山長嘯倚一作上
天梯小舟若鳧鴈大舟若鯨鯢開帆散長風舒卷與
雲齊一作入牛渚海蒼然夕煙迷相思在何所一作定杳

在洛陽西

送儲邕之武昌

黃鶴西樓月長江萬里情春風三十度空憶武昌城
送爾難為別銜杯惜未傾湖連張樂地山逐汎舟行
諾謂楚人重詩傳謝朓清滄浪吾有曲寄入棹歌聲

訓荅上

訓談少府襄萇

一尉居倏忽梅生有仙骨三事或可羞匈奴哂千秋
壯心屈黃綬浪跡寄滄洲昨觀荆峴作如從雲漢遊
老夫當暮矣蹠足懼驂騑

訓宇文少府見贈桃竹書筒

李十一

六

李十一

五

李十九
九
桃竹書筒綺繡文良工巧妙稱絕羣靈心圓映三江
月彩質疊成五色雲中藏寶訣峨眉去千里提攜長
憶君

五月東魯行荅汶上翁 魯中

五月梅始黃 一作禾黍蠶凋桑柘空魯人重織作機杼鳴
簾櫳顧余不及仕學劒來山東舉鞭訪前途獲笑汶
上翁下愚 一作忽壯士未足論窮通我以一箭書能取
聊城功終然不受賞羞與時人同西歸去直道落日
昏陰虹此 一作去爾勿言甘心如轉蓬

早秋單父南樓訓竇公衡

白露見日滅紅顏隨霜凋別君若俯仰春芳辭秋條

太山峩峩夏雲在疑是白波漲東海散為飛雨川上
來遙帷却卷清浮埃知君獨坐青軒下此時結念同
懷者我閉南樓著道書幽簾清寂若仙居曾無好事
來相訪賴爾高文一起予

山中荅俗人 一云荅問

問余何意 一作樓碧山笑而不荅 一作心自閑桃花流水
皆 一作然去別有天地非人間

荅友人贈烏紗帽

領得烏紗帽全勝白接離山人不照鏡稚子道相宜

訓張司馬贈墨 吳中

上黨碧松煙夷陵丹沙末蘭麝凝珍墨精光乃堪掇

黃頭奴子雙鷓鴣錦囊養之懷袖間今日贈余蘭亭
去興來灑筆會稽山

荅湖州迦葉司馬問白是何人

青蓮居士謫仙人酒肆藏名三十春湖州司馬何須
問金粟如來是後身

荅長安崔少府叔封遊終南翠微寺太宗皇

帝金沙泉見寄長安

河伯見海若傲然誇秋水小物暗遠圖寧知通方士

一作寧識通方理多君紫霄意獨往蒼山裏地古寒雲一作雪深巖

高長風起初登翠微嶺復憩金沙泉踐苔朝霜滑弄

波夕月圓飲彼石下流一作潭結蘿宿谿煙鼎湖夢綠水

龍駕空何一作茫然早行子午間一作開却登山路遠一作歎山路

識又作頗遠拂琴聽霜猿滅燭乃星飯人煙無明異鳥

道絕往返攀崖倒青天一作到下視白日晚既過一作石

門隱還唱一作石潭歌涉雪蹇紫芳一作采濯纓想一作清

波此一作斯人不可見此地君自過為余謝風泉其如幽

意何

贈李十二左司郎中崔宗之附

涼秋八九月白露空園庭耿耿意不暢捎捎一作風葉

聲思見雄俊士共話今古情李侯忽來儀把袂苦不

早清論既抵掌立談又絕倒分明楚漢事歷歷王霸

道擔囊無俗物訪古千里餘袖有匕首劍懷中茂陵

書雙眸光照人詞賦凌子虛酌酒絃素琴霜氣正凝
潔平生心事中今日為君說我家有別業寄在嵩之
陽明月出高岑清溪澄素光雲散牕戶靜風吹松桂
香子若同斯遊千載不相忘

訓崔五郎中

朔雲橫高天萬里起秋色壯士心飛揚落日空歎息
長嘯出原野凜然寒風生幸遭聖明時功業猶未成
奈何懷良圖鬱悒獨愁坐一作空杖策尋英豪立談乃
知我崔公生人秀緬邈青雲姿制作叅造化託諷含
神祇海嶽尚可傾吐諾終不移是時霜飈寒逸興臨
華池起舞拂長劍四座皆揚眉因得窮歡情贈我以

新詩又結汗漫期九垓遠相待舉身憩蓬壺濯足弄
滄海從此凌倒景一去無時還朝遊明光宮暮入閭
闔關但得長把袂何必嵩丘山

以詩代書荅元丹丘

青鳥一作鳥海上來今朝發何處口銜雲錦字一作書與我忽
飛去鳥去凌紫煙書留綺牕前開緘方一作時一笑乃是
故人傳故人深相勗憶我勞心曲離居在咸陽三見
秦草綠置書雙袂間引領不暫閑長望一作歎杳難見浮
雲橫遠山

金門荅蘇秀才

君還石門日朱火始改木春草如有情山中尚含綠

折芳愧遙憶永路當自勗遠見故人心平生以此足
巨海納百川麟閣多才賢獻書入金闕酌醴奉瓊筵
屢忝白雲唱恭聞黃竹篇恩光煦拙薄雲漢希騰遷
銘鼎儻云遂扁舟方渺然我留在金門不去卧丹壑
未果三山期遙欣一丘樂玄珠寄罔象赤水非寥廓
願狎東海鷗共營西山藥栖巖君寂蔑處世余龍蠖
良辰不同賞永日應閑居鳥吟簷間樹花落窓下書
緣谿見綠篠隔岫窺紅葉採薇行笑歌眷我情何已
月出石鏡間松鳴風琴裏得心自虛妙外物空頽靡
身世如兩忘從君老煙水

訓坊州王司馬與閻正字對雪見贈陝右

遊子東南來自宛適京國飄然無心雲倏忽復西北
訪戴昔未偶尋嵇此相得愁顏發新歡終宴敘前識
閻公漢庭舊沉鬱富才力價重銅龍樓聲高重門側
寧期此相遇華館陪遊息積雪明遠峯寒城沍春色
主人蒼生望假我青雲翼風水如見資投竿佐皇極

訓中都小吏攜斗酒雙魚於逆旅見贈齊魯

魯酒若琥珀一作琥汶魚紫錦鱗山東豪吏有俊氣手
攜一作持此物贈遠人意氣相傾兩相顧斗酒雙魚表情
素酒來我飲之鱠作別離處雙鯉呼呷鱖鬣張跋刺
銀盤欲飛去呼兒拂机霜刃揮紅肥花落白雪霏為
君下筯一餐飽一作罷醉著金鞍上一作走馬歸

李十一
訓張卿夜宿南陵見贈

月出魯城東明如天上雪魯女驚莎雞鳴機應秋節
當君相思夜火落金風高河漢挂戶牖欲濟無輕舸
我昔辭林丘雲龍忽相見客星動太微朝去洛陽殿
爾來得茂彥七葉仕漢餘身為下邳客家有圯橋書
傳說未夢時終當起巖野萬古騎辰星光輝照天下
與君各未遇長策委蒿萊寶刀隱玉匣鏞遊空莓苔
遂令世上愚輕我土與灰一朝攀龍去蠅黽安在哉
故山定有酒與爾傾金壘

訓岑勛見尋就元丹丘對酒相待以詩見招
黃鶴東南來寄書寫心曲倚松開其緘憶我腸斷續

不以千里遙命駕來相招中逢元丹丘登嶺宴碧霄
對酒忽思我長嘯臨清飈蹇余未相知茫茫綠雲垂
俄然素書及解此長渴飢策馬望山月途窮造堦墀
喜茲一會面若覩瓊樹枝憶君我遠來我歡方速至
開顏酌美酒樂極忽成醉我情既不淺君意方亦深
相知兩相得一顧輕千金且向山客笑與君論素心
荅從弟幼成過西園見贈

一身自蕭灑萬物何囂喧拙薄謝明時棲閑歸故園
二季過舊壑四鄰馳華軒衣劔照松宇賓徒光石門
山童薦珍果野老開芳罇上陳樵漁事下敘農圃言
昨來荷花滿今見蘭苕繁一笑復一歌不知夕景昏

醉罷同所樂此情難具論

訓王補闕惠翼莊廟宋丞泚贈別

學道三十春自言羲皇人軒蓋宛若夢雲松長相親
偶將二公合復與三山鄰喜結海上契自爲天外賓
鸞翻我先鍛龍性君莫馴朴散不尚古時訛皆失真
勿踏荒溪波竭來浩然津薛帶何辭楚桃源堪避秦
世迫且離別心在期隱淪訓贈非烟誠未言銘珮紳

李太白文集卷第十六

吳門繆曄武子甫重刊宋本

李太白文集卷第十七

歌詩三十首

酬荅下

荅王十二寒夜獨酌有懷 再入吳中

昨夜吳中雪子猷佳興發萬里浮雲卷碧山青天中
道流孤月孤月蒼浪一作波河漢清北斗錯落長庚明懷
余對酒夜霜白玉牀金井冰崢嶸人生飄忽百年內
且須酣暢萬古情君不能狸膏金距學鬪雞坐令鼻
息吹虹霓君不能學哥舒橫行青海夜帶刀西屠石
堡取紫袍吟詩作賦北牕裏萬言不直一杯水世人
聞此一作之皆掉頭有如東風射馬耳魚目亦笑我請一作謂

與明月同驕驕拳跼不能食蹇驢得志鳴春風折楊
黃花合流俗晉君聽琴枉清角一作人誰肯和陽春
楚地猶來賤竒璞黃金散盡交不成白首爲儒身被
輕一談一笑失顏色蒼蠅貝錦喧謗聲曾參豈是殺
人者讒言三及慈母驚與君論心握君手榮辱於余
亦何有孔聖猶聞傷鳳麟董龍更是何雞狗一生傲
岸苦不諧恩踈媒勞志多乖嚴陵高揖漢天子何必
長劔挂頤事玉階達亦不足貴窮亦不足悲韓信羞
將絳灌比襴衡恥逐屠沽兒君不見李北海英風豪
氣今何在君不見裴尚書土墳三尺蒿棘一作居少年
早欲五湖去見此彌將鍾鼎踈

訓裴侍御對雨感時見贈金陵

雨色秋來寒風嚴清江爽孤高繡衣人蕭灑青霞賞
平生多感激忠義非外獎禍連積怨生事及徂川往
楚邦有壯士鄢郢翻掃蕩申包哭秦庭泣血將安仰
鞭屍辱已及堂上羅宿莽頗似今之人蝨賊陷忠讜
渺然一水隔何由稅歸鞅日夕聽猿愁懷賢盈夢想

訓崔侍御

嚴陵不從萬乘遊歸卧空山釣碧流自是客星辭帝
坐元非太白醉揚州

贈李十二攝監察御史崔成甫

附

我是瀟湘放逐臣君辭明主漢江濱天外常求太白

老金陵捉得酒仙人

翫月金陵城西孫楚酒樓達曙歌吹日晚乘
醉著紫綺裘烏紗巾與酒客數人棹歌秦淮
往石頭訪崔四侍御

昨翫西城月青天垂玉鈎朝沽金陵酒歌吹孫楚樓
忽憶繡衣人乘舫往石頭草裏烏紗巾倒披紫綺裘
兩岸拍手笑疑是王子猷酒客十數公崩騰醉中流
謔浪掉海客喧呼傲陽侯半道逢吳姬卷簾出擲斂
我憶君到此不知狂與羞月下見君三杯便迴橈
捨舟共連袂行上南渡橋興發歌淥水秦客爲之搖
搖雞鳴復相招清宴逸雲霄贈我數百字字字凌風

風繫之衣裘上相憶每長謠

江上苔崔宣城

太華三芙蓉明星玉女峯尋仙下西岳陶令忽相逢
問我將何事湍波歷幾重貂裘非季子鶴氅似王恭
謬忝燕臺召而陪郭隗蹤水流知入海雲去或從龍
樹繞蘆洲月山鳴鵲鎮鍾還期如可訪台嶺蔭長松
苔族姪僧中孚贈玉泉仙人掌茶并序

余聞荊州玉泉寺近清溪諸山山洞往往有乳窟窟
中多玉泉交流中有一作白蝙蝠大如鷄按仙經蝙蝠
一名仙鼠千歲之後體白如雪一作棲則倒懸蓋飲乳
水而長生也其水邊處處有茗草羅生枝葉如碧玉

唯玉泉真公常采而飲之年八十餘歲顏色如桃花
而此茗清香滑熱異於他者所以能還童振枯壯一作扶
人壽也余遊金陵見宗僧中孚示余茶數十片拳然
重疊其狀如手號為仙人掌茶蓋新出乎玉泉之山
曠古未覲因持之見遺兼贈詩要余荅之遂有此作
後之高僧大隱知仙人掌茶發乎中孚禪子及青蓮
居士李白也

常聞玉泉山洞多乳窟仙鼠如白鷄倒懸深一作清谿
月茗生此中石玉泉流不歇根柯灑芳津採服潤肌
骨楚老卷綠葉枝枝相接連曝成仙人掌似拍洪崖
肩舉世未見之其名定誰傳宗英乃禪伯投贈有佳

篇清鏡燭無鹽顧慙西子妍朝坐有餘興長吟播諸
天

訓裴侍御留岫師彈琴見寄

君同鮑明遠邀彼休上人鼓琴亂白雪秋變江上春
瑤草綠未衰攀翻寄情親相思兩不見流淚空盈巾

張相公出鎮荊州尋除太子詹事余時流夜
郎行至江夏與張公相去千里公因太府丞
王昔使車寄羅衣二事及五月五日贈余詩

余荅以此詩流夜郎至江夏

張衡殊不樂應有四愁詩慙君錦繡段贈我慰相思
鴻鵠復矯翼鳳皇憶故池榮樂一如此商山老紫芝

醉後荅丁十八以詩譏予搥碎黃鶴樓

黃鶴高樓已搥碎黃鶴仙人無所依黃鶴上天訴玉
帝却放黃鶴江南歸神明太守再凋飾新圖粉壁還
芳菲一州笑我為狂客少年往往來相譏君平簾下
誰家子云是遼東丁令威作詩掉我驚逸興白雲遠
筆認前飛待取明朝酒醒罷與君瀾漫尋春暉

荅裴侍御先行至石頭驛以書見招期月滿

汎洞庭

君至石頭驛寄書黃鶴樓開緘識遠意速此南行舟
風水無定準湍波或一作成滯留憶昨新一作初月生西簷若
瓊鈎今來何所似破鏡懸清秋恨不三五明平湖汎

澄流此歡竟莫遂狂殺王子猷巴陵定近遠持贈何
人憂

荅高山人兼呈權顧二侯

虹霓掩天光哲后起康濟應運生夔龍開元掃氛翳
太微廓金鏡端拱清遐裔輕塵集嵩岳虛點盛明意
謬揮紫泥詔獻納青雲際讒惑英主心恩踈佞臣計
徬徨庭闕下歎息光陰逝未作仲宣詩先流賈生涕
挂帆秋江上不為雲羅制山海向東傾百川無盡勢
我於鷗夷子相去千餘歲運闊英達稀同風遙執袂
登艫望遠水忽見滄浪拙高士何處來虛舟眈安繫
衣貌本淳古文章多佳麗延引故鄉人風義未淪替

李十七
五
顧侯達語默權子識通蔽曾是無心雲俱為此留滯
雙萍易飄轉獨鶴思凌厲明晨去瀟湘共謁蒼梧帝

荅杜秀才五松山見贈

五松山南陵銅坑
西五六里宣城

昔獻長楊賦天開雲雨歡當時待詔承明裏皆道揚
雄才可觀勅賜飛龍二天馬黃金絡頭白玉鞍浮雲
蔽日去不返摠為秋風摧紫蘭角巾東出商山道採
秀行歌詠芝草路逢園綺笑向人而君解來一何好
聞道金陵龍虎盤還同謝朓望長安千峯夾水向秋
浦五松名山當夏寒銅井炎鑪敲九天赫如鑄鼎荆
山前陶公攫爍呵赤電回祿睚眦揚紫煙此中豈是
久留處便欲燒丹從列仙愛聽松風且高卧颼颼吹

盡炎氛過登崖獨立望九州陽春欲奏誰相和聞君
往年遊錦城章仇尚書倒屣迎飛牋絡驛奏明主人
書降問迴恩榮骭髀不能就珪組至今空揚高道名
夫子工文絕世奇五松新作天下推吾非謝尚邀彥
伯異代風流各一時一時相逢樂在今袖拂白雲開
素琴彈為三峽流泉音從茲一別武陵去去後桃花
春水深

至陵陽山登天柱石訓韓侍御見招隱黃山

韓衆騎白鹿西往華山中玉女千餘人相隨在雲空
見我傳秘訣精誠與天通何意到陵陽遊目送飛鴻
天子昔避狄與君亦乘驄擁兵五陵下長策遏胡戎

時泰解繡衣脫身若飛蓬鸞鳳翻翕翼啄粟坐樊籠
海鶴一笑之思歸向遼東黃山過石柱巘萼上攢叢
因巢翠玉樹忽見浮丘公又引王子喬吹笙舞松風
朗詠紫霞篇請開藥珠宮步網繞碧落倚樹招青童
何日可攜手遺形入無窮

訓崔十五見招

爾有鳥跡書相招琴溪飲手跡尺素中如天落雲錦
讀罷向空笑疑君在我前長吟字不滅懷袖且三年

遊宴上

遊南陽白水登石激作

襄陽

朝涉白水源暫與人俗踈島嶼佳境色江天涵清虛

目送去海雲心閑遊川魚長歌盡落日乘月歸田廬

遊南陽清冷泉

惜彼落日暮愛此寒泉清西耀逐水流蕩漾遊子情
空歌望雲月曲盡長松聲

尋魯城北范居士失道落蒼耳中見范置酒

摘蒼耳作

魯中

鴈度秋色遠日靜無雲時客心不自得浩漫將何之
忽憶范野人閑園養幽姿茫然起逸興但恐行來遲
城壕失往路馬首迷荒陂不惜翠雲裘遂為蒼耳欺
入門且一笑把臂君為誰酒客愛秋蔬山盤薦霜梨
他筵不下筋此席忘朝飢酸棗垂北郭寒瓜蔓東籬

還傾四五酌自詠猛虎詞近作十日歡遠爲千載期
風流自簸蕩謔浪偏相宜酣來上馬去却笑高陽池

魯東門汎舟二首

日落沙明天倒開波搖石動水縈迴輕舟汎月尋溪
轉疑是山陰雪後來

水作青龍盤石堤桃花夾岸魯東門西若教月下乘舟
去何啻風流到剡溪

秋獵孟諸夜歸置酒單父東樓觀妓

傾暉速短炬走海無停川冀食圓丘草欲以還頽年
此事不可得微生若浮煙俊發跨名駒雕弓控鳴弦
鷹豪魯草白狐兔多肥鮮邀遮相馳逐遂出城東田

一掃四野空喧呼鞍馬前歸來獻所獲炮炙宜霜天
出舞兩美人飄飄若雲仙留歡不知疲清曉方來旋

遊太山六首

一作天寶元年四月
從故御道上太山

四月上太山石平御道開六龍過萬壑澗谷隨縈迴
馬跡遶碧峯于今滿青苔飛流灑絕巘水急一作松聲哀
北眺崑嶂竒傾崖向東摧洞門閉石扇地底興雲雷
登高望蓬瀛想象金籙臺天門一長嘯萬里清風來
玉女四五人飄飄下九垓含笑引素手遺我流霞盃
稽首再拜之自媿非仙才曠然小宇宙棄世何悠哉
清曉騎白鹿直上天門山山際逢羽人方瞳好容顏
捫蘿欲就語却掩青雲關遺我鳥跡書飄然落巖間

其字乃上古讀之了不閑感此三歎息從師方未還
平明登日觀舉手開雲關精神四飛揚如出天地間
黃河從西來窈窕入遠山憑崖覽八極目盡長空閑
偶然值青童綠髮雙雲鬢笑我晚學仙蹉跎凋朱顏
躊躇忽不見浩蕩難追攀

清齋三千日裂素寫道經吟誦有所得衆神衛我形
雲行信長風颯若羽翼生攀崖上日觀伏檻窺東溟
海色動遠山天雞已先鳴銀臺出倒景白浪翻長鯨
安得不死藥高飛向蓬瀛

日觀東北傾兩崖夾雙石海水落眼前天光遙空碧
千峯爭攢聚萬壑絕凌歷緬彼鶴上仙去無雲中跡

長松入霄漢遠望不盈尺山花異人間五月雪中白
終當遇安期於此鍊玉液

朝飲王母池暝投天門闕獨抱綠綺琴夜行青山月
山明月露日夜靜松風歇仙人遊碧峯處處笙歌發
寂聽娛清輝玉真連翠微想像鸞鳳舞飄飄龍虎衣
捫天摘匏瓜恍惚不憶歸舉手弄清淺誤攀織女機
明晨坐相失但見五雲飛

秋夜與劉碭山汎宴喜亭池

明宰試舟楫張燈宴華池文招梁苑客歌動郢中兒
月色望不盡空天交相宜令人欲汎海只待長風吹

攜妓登梁王棲霞山孟氏桃園中

碧草已滿地與柳梅爭春謝公自有東山妓金屏笑
坐如花人今日非昨日明日還復來白髮對綠酒強
歌心已摧君不見梁王池上月昔照梁王樽酒中梁
王已去明月在黃鸝愁醉啼春風分明感激眼前事
莫惜醉卧桃園東

觀魚潭

觀魚碧潭上木落潭水清日暮紫鱗躍圓波處處生
涼烟浮竹盡秋月照沙明何必滄浪去茲焉可濯纓

李太白文集卷第十七

吳門繆是武子甫重刊宋本

李太白文集卷第十八

歌詩四十六首

遊宴下

與從姪杭州刺史良遊天竺寺

吳中

挂席凌蓬丘觀濤憩樟樓三山動逸興五馬同遨遊
天竺森在眼松門颯驚秋覽雲測變化弄水窮清幽
壘嶂隔遙海當軒寫歸流詩成傲雲月佳趣滿吳洲
同友人舟行遊台越作

楚臣傷江楓謝客拾海月懷沙去瀟湘挂席汎溟渤
蹇予訪前跡獨往造窮髮古人不可攀去若浮雲沒
願言弄倒景從此鍊真骨華頂窺絕冥蓬壺望超忽

不知青春度但怪綠芳歇空持釣鰲心從此謝魏闕

下終南山過斛斯山人宿置酒 長安

暮從碧山下山月隨人歸却顧所來徑蒼蒼橫翠微
相攜及田家童稚一作稚子開荆扉綠竹入幽援青蘿拂行
衣歡言得所憩美酒聊共揮長歌吟松風曲盡河星
稀我醉君復樂陶然共忘機

朝下過盧郎中敘舊遊

君登金華省我入銀臺門幸遇聖明主俱承雲雨恩
復此休浣時閑為疇昔言却話山海事宛然林壑存
澄湖思曉月疊嶂憶清猿何由返初服田野醉芳樽
侍從遊宿溫泉宮作

羽林十二將羅列應星文霜仗懸秋月蜺旌卷夜雲
嚴更千戶肅清樂九天聞日出瞻佳氣叢叢繞聖君

邯鄲南亭觀妓 燕趙

歌鼓一作妓燕趙兒魏姝弄鳴絲粉色艷月彩舞袖一作衫拂
花枝把酒領一作顧美人請歌邯鄲詞清箏何繚繞度曲
綠雲垂平原君安在科斗生古池座客三千人于今
知有誰我輩不作樂但為後代悲

春遊羅敷潭

行歌入谷口路盡無人躋攀崖度絕壑弄水尋迴磔
雲從石上起客到花間迷淹留未盡興日落羣峯西
春陪商州裴使君遊石娥溪 時欲東歸遂有此贈

裴公有仙標拔俗數千丈澹蕩滄洲雲飄飄紫霞想
剖竹商洛間政成心已閑蕭條出世表冥寂閉玄關
我來屬芳節解榻時相悅褰帷對雲峯揚袂拍松雪
暫出東城邊遂遊西巖前橫天聳翠壁噴壑鳴紅泉
尋幽殊未歇愛此春光發溪傍饒名花石上有好月
命駕歸去來露華生綠苔淹留昔將晚復聽清猿哀
清猿斷人腸遊子思故鄉明發首東路此歡焉可忘
陪從祖濟南太守汎鵲山湖三首 齊州
初謂鵲山近寧知湖水遙此行殊訪戴自可緩歸橈
湖闊數十里湖光搖碧山湖西正有月獨送李膺還
水入北湖去舟從南浦迴遙看鵲山轉却似送人來

春日陪楊江寧及諸官宴北湖感古作 金陵

昔聞顏光祿攀龍宴京 一作重湖樓舫入天鏡帳殿開
雲衢君王歌大風如樂豐沛都延年獻嘉作邈與詩
人俱我來不及此獨立鍾山孤楊宰穆清飈 一作風芳聲
騰海隅英寮滿四座粲若瓊林敷鷁首弄倒景蛾眉
楊明珠新絃綵 一作來梨園古舞嬌吳歛曲度繞雲 一作清漢
聽者皆歡娛鷄棲何嘈嘈 一作江月涕笙竽古之帝宮
苑今乃人樵蘇感此勸一觴願君覆瓢壺榮盛 一作盛時當
作樂無令後賢吁

宴鄭叅卿山池

爾恐碧草晚我畏朱顏移愁看楊花飛置酒正相宜

歌聲送落日舞影迴清池今夕不盡盃留歡更邀誰

遊謝氏山亭

淪老卧江海再歡天地清病閑久寂寞歲物徒芬榮
借君西池遊聊以散我情掃雪松下去捫蘿石道行
謝公池塘上春草一作風颯已生花枝拂人來山鳥向我
鳴田家有美酒落日與之傾醉罷弄歸月遙放稚子
迎

把酒問月

故人賈淳之

青天有月來幾時我今停盃一問之人攀明月不可
得月行却與人相隨皎如飛鏡臨丹闕綠煙滅盡清
暉發但見宵從海上來寧知曉向雲間沒白兔搗藥

秋復春姮娥孤棲與誰鄰今人不見古時月今月曾
經照古人古人今人若流水共看明月皆如此唯願
當歌對酒時月光長照金樽裏

同族姪一作弟評事黯遊昌禪師山池二首

遠公愛康樂爲我開禪關蕭然松石下何異清涼山
花將色不染水與心俱閑一坐度小劫觀空天地間
客來花雨際秋水落金池片石寒青錦踈楊挂綠絲
高僧拂玉柄童子獻霜梨惜去愛佳景煙蘿欲暝時

金陵鳳凰臺置酒

置酒延落景金陵鳳凰臺長波寫萬古心與雲俱開
借問往昔時鳳凰爲誰來鳳凰去已久正當今日迴

明君越義軒天老坐三台豪士無所用彈絃醉金罍
東風吹山花安可不盡杯六帝沒幽草深宮冥綠苔
置酒勿復道歌鍾但相催

秋浦清溪雪夜對酒客有唱鷓鴣者秋浦

披君一作我貂襜褕對君白玉壺雪花酒上滅頓覺夜寒
無客有桂陽至能吟山鷓鴣清風動牕竹越鳥起相
呼持此足為樂何煩笙與竽

與周剛青溪王鏡潭宴別潭在秋浦桃樹陂下予新名此潭

康樂上官去永嘉遊石門江亭有孤嶼千載跡猶存
我來憩秋浦三入桃陂源千峯照一作點積雪萬壑盡啼
猿興與謝公合文因周子論掃崖去落葉席月開清

罇溪當大樓南溪水正南奔迴作玉鏡潭澄明洗心
魂此中得佳境可以絕囂喧清夜方歸來酣一作歌出
平原別後經此地為予謝蘭蓀

遊秋浦白筇陂二首

何處夜行好月明白筇陂山光搖積雪猿影挂寒枝
但恐佳景晚小令歸棹移人來有清興及此有相思
白筇夜長嘯爽然溪谷寒魚龍動陂水處處生波瀾
天借一明月飛來碧雲端故鄉不可見腸斷正西看

宴陶家亭子尋陽

曲巷幽人宅高門大士家池開照膽鏡林吐破顏花
綠水藏春日青軒祕晚霞若聞絃管妙金谷不能誇

在水軍宴韋司馬樓船觀妓軍中

搖曳帆在空清流一作順歸風詩因鼓吹發酒為劍歌
雄對舞青樓妓雙鬢白玉童行雲且莫去留醉楚王
宮

流夜郎至江夏陪長史叔及薛明府宴興德

寺南閣江夏

紺殿橫江上青山落鏡中岸迴沙不盡日映水成空
天樂流一作香閣蓮舟颺晚風恭陪竹林宴留醉與陶
公

汎沔州城南郎官湖并序

乾元歲秋八月白遷於夜郎遇故人尚書郎張謂出

使夏口沔州牧杜公漢陽宰王公觴于江城之南湖
樂天下之再平也方夜水月如練清光可掇張公殊
有勝槩四望超然乃顧白曰此湖古來賢豪遊者非
一而枉踐佳景寂寥無聞夫子可為我標之嘉名以
傳不朽白因舉酒酹水号之曰郎官湖亦由鄭圃之
有僕射陂也席上文士輔翼岑靜以為知言乃命賦
詩紀事刻石湖側將與大别山共相磨滅焉
張公多逸興共汎沔城隅當時秋月好不減武昌都
四坐醉清光為歡古來無郎官愛此水因号郎官湖
風流若未減名與此山俱

陪侍郎叔遊洞庭醉後三首

今日竹林宴我家賢侍郎三盃容小阮醉後發清狂
船上齊橈樂湖心汎月歸白鷗閑不去爭拂酒筵飛
剗却君山好平鋪湘水流巴陵無限酒醉殺洞庭秋

夜汎洞庭尋裴侍御清酌

日晚湘水淥孤舟無端倪明湖漲秋月獨汎巴陵西
遇憩裴逸人巖居陵丹梯抱琴出深竹爲我彈鷓鴣
曲盡酒亦傾北牕醉如泥人生且行樂何必組與珪
陪族叔刑部侍郎擘及中書賈舍人至遊洞

庭五首

洞庭西望楚江分水盡南天不見雲日落長沙秋色
遠不知何處弔湘君

南湖秋水夜無煙耐可乘流直上天且就洞庭賒月
色將船買酒白雲邊

洛陽才子謫湘川元禮同舟月下仙記得長安還欲
笑不知何處是西天

洞庭湖西秋月輝瀟湘江北早鴻飛醉客滿船歌白
紵不知霜露入秋衣

帝子瀟湘去不還空餘秋草洞庭間淡掃明湖開玉
鏡丹青畫出是君山

楚江黃龍磯南宴楊執戟冶樓荆楚

五月分五洲碧山對青樓故人楊執戟春賞楚江流
一見醉漂月三杯歌棹謳桂枝攀不盡他日更相求

銅官山醉後絕句 宣城

我愛銅官樂千年未擬還要湏迴舞袖拂盡五松山

與南陵常贊府遊五松山 山有南陵銅井西五里有古精舍

安石汎溟渤獨嘯長風還逸韻動海上高情出人間
靈異可並跡澹然與世閑我來五松下置酒窮躋攀
徼古絕遺老因名五松山五松何清幽勝境美沃洲
蕭颯鳴洞壑終年風雨秋響入百泉去聽如三峽流
剪竹掃天花且從傲吏遊龍堂若可憩吾欲歸精脩

宣城清溪 一作山

青溪勝桐廬水木有佳色山兒日高古石容天傾側
綵鳥昔未名白猿初相識不見同懷人對之空歎息

與謝良輔遊涇川陵巖寺

乘君素舸汎涇西宛似雲門對若溪且從康樂尋山

水何必東遊入會稽

遊水西簡鄭明府

天宮水西寺雲錦照東郭清湍鳴迴溪綠竹遶飛閣
涼風日蕭洒幽客時憩泊五月思貂裘謂言秋霜落
石蘿引古蔓岸筍開新籜吟翫空復情相思爾佳作
鄭公詩人秀逸韻宏寥廓何當一來遊愜我雪山諾

九日登山

淵明歸去來不與世相逐為無杯中物遂偶本州牧
因招白衣人笑酌黃花菊我來不得意虛過重陽時

題輿何俊發遂結城南期築土接響山俯臨宛水湄
胡人叫玉笛越女彈霜絲自作英王冑斯樂不可窺
赤鯉湧琴高白龜道冰夷靈仙如彷彿奠酌遙相知
古來登高人今復幾人在滄洲違宿諾明日猶可待
連山似鷲波合沓出溟海揚袂揮四座醅酌安所知
齊歌送清觴起舞亂參差賓隨葉落散帽逐秋風吹
別後登此臺願言長相思

九日

今日雲景好水綠秋山明攜壺酌流霞塞菊汎寒榮
地遠松石古風揚絃管清窺觴照歡顏獨笑還自傾
落帽醉山月空歌懷友生

九日龍山飲

當塗

九日龍山飲黃花笑逐臣醉看風落帽舞愛月留人

九月十日即事

昨日登高罷今朝更舉觴菊花何太苦遭此兩重陽
陪族叔當塗宰遊化城寺升公清風亭

化城若化出金榜天宮開疑是海上雲飛空結樓臺
外公湖上一作秀粲然有辯才濟人不利已立俗無嫌
猜了見水中月青蓮出塵埃閑居清風亭左右清風
來當暑陰廣殿太陽為徘徊茗酌待幽客珍盤薦彫
梅飛文何灑落萬象為之摧季父擁鳴琴德聲布雲
雷雖遊道林室亦一作舉陶潛孟清樂動諸天長松自

吟哀留歡若可盡劫石乃成灰

李太白文集卷第十八

吳門繆晁武子甫重刊宋本

李太白文集卷第十九

歌詩三十六首

登覽

登錦城散花樓

蜀中

日照錦城頭朝光散花樓金牕夾繡戶珠箔懸瓊鉤
飛梯綠雲中極目散我憂一作愁暮雨向三峽春江繞雙
流今來一登望如上九天遊

登峨眉山

蜀國多仙山峨眉邈難匹周流試登覽絕怪安可悉
青冥倚天開彩錯疑畫出冷然紫霞賞果得錦囊術
雲間吟瓊簫石上弄寶瑟平生有微尚歡笑自此畢

煙容如在顏塵累忽相失儻逢騎羊子攜手凌白日

大庭庫 魯中

朝登大庭庫雲物何蒼然莫辨陳鄭火空霾鄒魯烟
我來尋梓慎觀化入寥天古木翔氣多松風如五絃
帝圖終冥沒歎息滿山川

登單父陶少府半月臺

陶公有逸興不與常人俱築臺像半月迥向一作高城
隅置酒望白雲商一作颶起寒梧秋山入遠海桑柘羅
平蕪水色綠且明一作清令人思鏡湖終當過江去愛此
暫踟躕

天台曉望 吳中

天台隣四明華頂高百越門標赤城霞樓棲滄島月
憑高遠登覽直下見溟渤雲垂大鵬翻波動巨鼇沒
風潮爭洶湧神怪何翕忽觀竒跡無倪好道心不歇
攀條摘朱實服藥鍊金骨安得生羽毛千春卧蓬闕

早望海霞邊

四明三千里朝起赤城霞日出紅光散分輝照雪崖
一餐嚙瓊液五內發金沙舉手何所待青龍白虎車

焦山杏望松寥山

石壁望松寥宛然在碧霄安得五綵虹架天作長橋
仙人如愛我舉手來相招

杜陵絕句 長安

南登杜陵上北望五陵間秋水明落日流光滅遠山

登太白峯

西上太白峯夕陽窮登攀太白與我語為我開天關
願乘冷風去直出浮雲間舉手可近月前行若無山
一別武功去何時復更還

登邯鄲洪波臺置酒觀發兵

燕趙時將遊薊門

我把兩赤羽來遊燕趙間天狼正可射感激無時閑
觀兵洪波臺倚劍望玉關請纓不繫越且向燕然山
風引龍虎旗歌鐘昔一作憶追攀擊筑落高月投壺破愁
顏遙知百戰勝定掃鬼方還

登廣武古戰場懷古

秦鹿奔野草逐之若飛蓬項王氣蓋世紫雷明雙瞳
呼吸八千人橫行起江東赤精斬白帝叱咤入關中
兩龍不並躍五緯與天同楚滅無英圖漢興有來功
按劍清八極歸酣歌大風伊昔臨廣武連兵決雌雄
分我一杯羹太皇乃汝翁戰爭有古跡壁壘頽層穹
猛虎吟洞壑飢鷹鳴秋空翔雲列曉陣殺氣赫長虹
撥亂屬豪聖俗儒安可通沉湎呼豎子狂言非至公
撫掌黃河曲嗷嗷阮嗣宗

登新平樓

陝西

去國登茲樓懷歸傷暮秋天長落日遠水淨寒波流
秦雲起嶺樹胡鴈飛沙洲蒼蒼幾萬里目極令人愁

謁老君廟

梁宋

先君懷聖德靈廟肅神心
草合人蹤斷塵濃鳥跡深
流沙丹竈滅關路紫烟沉
獨傷千載後空餘松栢林

秋日登揚州西靈塔

淮南

寶塔凌蒼蒼登攀覽四荒
頂高元氣合標出海雲長
萬象分空界三天接盡梁
水搖金刹影日動火珠光
鳥拂瓊簷度霞連繡栢張
目隨征路斷心逐去帆揚
露浩梧楸白風催橘袖黃
玉毫如可見於此照迷方

登金陵冶城西北謝安墩

此墩即晉太傅謝安與右軍王羲之

同登超然有高世之志余將營園其上故作是詩金陵

晉室昔橫潰永嘉遂南奔
沙塵何茫茫龍虎鬪朝昏

胡馬風漢草天驕感中原
哲匠感積運雲鵬忽飛翻
組練照楚國旌旗連海門
西秦百萬衆戈甲如雲屯
投鞭可填江一掃不足論
江一作朝策我吞皇運有返
正醜虜無遺魂談笑遏橫流
蒼生望斯存冶城訪古
跡一作治城猶有謝安墩
憑覽周地險高標絕人喧
想像東山姿緬懷右軍言
梧桐識佳樹蕙草留芳根
白鷺映春洲青龍見朝暎
地古雲物在臺傾禾黍繁
我來酌清波於此樹名園
功成拂衣去歸入長嘯武陵源

登瓦官閣

晨登瓦官閣極眺金陵城
鐘山對北戶淮水入南榮

漫漫雨花落嘈嘈天樂鳴兩廊振法鼓四角吟一作吹風
箏杳出霄漢上仰攀日月行山空霸氣滅地古寒陰
生寥廓雲海晚蒼茫宮觀平門餘閭闔字樓識鳳皇
名雷作百山動神扶萬拱傾靈光何足貴長此鎮吳京

登梅崗望金陵贈族姪高座寺僧中孚

鐘山抱金陵霸氣昔騰發天一作神開帝王居海色照宮
闕羣峯如逐鹿奔走相馳突江水九道來雲端遙明
沒時遷大運去龍虎勢休歇我來屬天清登覽窮楚
越吾宗挺禪伯特秀鸞鳳骨一作秀特異鸞鳳骨衆星羅
青天朗者獨有月冥居順生理草木不翦伐煙牕引
薔薇石壁老野蕨吳風謝安履白足傲履襪幾宿一

丁山

一作丁山來

蕭然忘干謁談經演金偈降鶴舞海雪時

聞天香來了與世事絕佳遊不可得春去惜遠別賦
詩留巖屏千載庶不滅

登金陵鳳皇臺

鳳皇臺上鳳皇遊鳳去臺空江自流吳宮一作時花草埋
幽徑晉代一作國衣冠成古丘三山半落青天外一水一作二水

望廬山瀑布二首

尋陽

西登香爐峯南見一作望瀑布水挂流三百丈一作三千丈噴壑
數十里歛如飛電一作練來隱若白虹起初驚河漢一作銀河落
半灑雲天裏一作金潭裏仰觀勢轉雄壯哉造化功海風

吹不斷江一作山月照還空空
中亂濼射左右洗青壁飛
珠散輕霞流沫沸穹石而
我遊名山對之心益閑無
論漱瓊液且得洗塵顏且
諧宿所好永願辭人間一作

集譜宿所好永歸人間

日照香爐生紫煙遙看瀑布挂長川飛流直下三千

尺疑是銀河落九一作半天一本題云望廬山香爐峯瀑布

香爐生紫煙下兩句同

望廬山五老峯

廬山東南五老峯青天削出金芙蓉九江秀色可攬
結吾將此地巢雲松

江上望皖公山宿松

竒峯出竒雲秀木含秀氣青冥皖公山巉絕稱人意
獨遊滄江上終日淡無味但愛茲嶺高何由討靈異
默然遙相許欲往心莫遂待吾還丹成投跡歸此地

望黃鶴山江夏

東望黃鶴山雄雄半空出四面生白雲中峯倚紅日
巖巖行穹跨峯嶂亦冥密頗聞列仙人於此學飛術
一朝向蓬海千載空石室金竈生烟埃玉潭秘清謐
地古遺草木庭寒老芝朮蹇余羨攀躋因欲保閑逸
觀竒徧諸嶽茲嶺不可匹結心寄青松永悟客情畢

鸚鵡洲

鸚鵡來過吳江水江上洲傳鸚鵡名鸚鵡西飛隴山

去芳洲之樹何青青煙開蘭葉香風暖岸夾桃花錦
浪生遷客此時徒極目長洲孤月向誰明

九日登巴陵置酒望洞庭水軍

時賊逼華容縣

九日天氣清登高無秋雲造化闢川岳了然楚漢分
長風鼓橫波合沓感龍文憶昔傳遊豫樓船壯橫汾
今茲討鯨鯢旆何繽紛白羽落酒樽洞庭羅三軍
黃花不掇手戰鼓遙相聞劒舞轉積陽當時日停曛
酣歌激壯士可以摧妖氛踞蹠東籬下泉明不足羣

秋登巴陵望洞庭

清晨登巴陵周覽無不極明湖映天光徹底見秋色
秋色何蒼然際海俱澄鮮山青滅遠樹水綠無寒煙

來帆出江中去鳥向日邊風清長沙浦霜空雲夢田
瞻光惜積髮閱水悲徂年北渚旣蕩漾東流自潺湲
郢人唱白雪越女歌採蓮聽此更腸斷憑崖淚如泉
與夏十二登岳陽樓

樓觀岳陽盡川迥洞庭開鴈引愁心去一作鴈別山
銜好月來雲間逢下榻天上接行盃醉後涼風起吹
人舞袖迴

登巴陵開元寺西閣贈衡岳僧方外

衡岳有開士五峯秀真骨見君萬里心海水照秋月
大臣南溟去問道皆請謁灑以甘露言清涼潤肌髮
明湖落天鏡香閣凌銀闕登眺餐惠風新花期啓發

與賈舍人於龍興寺剪落梧桐枝望瀝湖
剪落青梧枝瀝湖坐可窺雨洗秋山淨林光澹碧滋
水閑明鏡轉雲繞畫屏移千古風流事名賢共此時
挂席江上待月有懷

待月月未出望江江自流倏忽城西郭青天懸玉鈎
素華難可攬清景不同遊耿耿金波裏空瞻鵝鵲樓
金陵望漢江

漢江迴萬里派作九龍盤橫潰豁中國崔嵬飛迅湍
六帝淪亡後三吳不足觀我君混區宇垂拱衆流安
今日任公子滄浪罷釣竿

秋登宣城謝朓北樓宣城

江城如畫裏山晚望晴空兩水夾明鏡雙橋落采虹
人煙寒一作空橘柚秋色老梧桐誰念北樓上臨風懷謝
公

望天門山當塗

天門中斷楚江開碧水東流直北迴兩岸青山相對
出孤帆一片日邊來

望木瓜山

早起見日出暮看棲鳥還客心自酸楚况對木瓜山
登敬亭北二小山余時客逢崔侍御並登此地
送客謝亭北逢君縱酒還屈盤戲白馬大笑上青山
迴鞭指長安西日落秦關帝鄉三千里杳在碧雲間

過崔八丈水亭

高閣橫秀氣清幽併在君簷飛宛溪水惚落敬亭雲
後嘯風中斷漁歌月裏聞閑隨白鷗去沙上自爲羣

李太白文集卷第十九

吳門繆是武子甫重刊宋本

李太白文集卷第二十

歌詩六十一首

行役

安州應城玉女湯作安州

神女歿幽境湯池流大川陰陽結炎炭造化開靈泉
地底爍朱火沙傍歆素煙沸珠躍晴月皎鏡涵空天
氣浮蘭芳滿色漲桃花然精覽萬殊入潛行七澤連
愈疾功莫尚變盈道乃全濯纓掬清泚晞髮弄潺湲
散下楚王國分澆宋玉田可以奉巡幸奈何隔窮偏
獨隨朝宗水赴海輸微涓

之廣陵宿常二南郭幽居

淮南

淶水接柴門有如桃花源忘憂或假草滿院羅叢萱
暝色湖上來微雨飛南軒故人宿茅宇夕鳥歸楊園
還惜詩酒別深爲江海言明朝廣陵道獨憶此傾樽

夜下征虜亭

船下廣陵去月明征虜亭山花如繡頰江火似流螢

下途歸石門舊居

吳中

吳山高越水清握手無言傷別情將欲辭君挂帆去
離魂不散煙郊樹此心鬱悵誰能論有愧叨承國士
恩雲物共傾三月酒歲時同餞五侯門羨君素書常
滿椀含丹照白霞色爛余嘗學道窮冥筮夢中往往
遊仙山何當脫屣謝時去壺中別有日月天俛仰人

間易凋朽鑪峯五雲在軒牖惜別愁窺玉女牕歸來
笑把洪崖手隱居寺隱居山陶公鍊液棲其間靈神
閉氣昔登攀恬然但覺心緒閑數人不知幾甲子昨
來猶帶冰霜顏我離雖則歲物改如今了然識所在
別君莫道不盡懽懸知樂客遙相待石門流水徧桃
花我亦曾到秦人家不知何處得雞豕就中仍見繁
桑麻脩然遠與世事間裝鸞駕鶴又服遠何必長從
七貴遊勞生徒聚萬金產挹君去長相思雲遊雨散
從此辭欲知悵別心易苦向暮春風楊柳絲

客中作

蘭陵美酒鬱金香玉碗盛來琥珀光但使主人能醉

客不知何處是他鄉

太原早秋 并州

歲落衆芳歇時當大火流霜威出塞早雲色渡河秋
夢遶邊城月心飛故國樓思歸若汾水無日不悠悠

奔亡道中五首 江東

蘇武天上田橫海島邊萬重關塞斷何日是歸年
亭伯去安在李陵降未歸愁容變海色短服改胡衣
談笑三軍却交遊七貴踈仍留一隻箭未射魯連書
函谷如玉關幾時可生還洛川爲易水嵩岳是燕山
俗變羌胡語人多沙塞顏申包唯慟哭七日鬚毛班
綠絲望湖水青青蘆葉齊歸心落何處日沒大江西

歇馬傍春草欲行遠道迷誰忍子規鳥連聲向我啼

郢門秋懷 荆州江夏岳陽

郢門一爲客巴月三成弦朔風正搖落行子愁歸旋
杳杳山外日茫茫江上天人迷洞庭水鴈度瀟湘煙
清曠諧宿好緇磷及此年百齡何蕩漾萬化相推遷
空謁蒼梧帝徒尋溟海仙已聞蓬岳淺豈見三桃園
倚劔增浩歎捫襟還自憐終當遊五湖濯足滄浪泉
至鴨欄驛上白馬磯贈裴侍御

側壘萬古石橫爲白馬磯亂流若電轉舉棹揚珠輝
臨驛卷緹幕升堂接繡衣情親不避馬爲我解霜威
荆門浮舟望蜀江

春水月峽來浮舟望安極正見桃花流依然錦江色
江色淥且明茫茫與天平逶迤巴山盡遙曳楚雲行
雪照聚沙鴈花飛出谷鷓芳洲却已轉碧樹森森迎
流目浦煙夕揚帆海月生江陵識遙火應到渚宮城

上三峽

巫山夾青天巴水流若茲巴水忽可盡青天無到時
三朝上黃牛三暮行太遲三朝又三暮不覺鬢成絲
自巴東舟行經瞿唐峽登巫山最高峯晚還

題壁

江行幾千里海月十五圓始經瞿唐峽遂步巫山巔
巫山高不窮巴國盡所歷日邊攀垂蘿霞外倚穹石

飛步凌絕頂極目無纖煙却顧失丹壑仰觀臨青天
青天若可捫銀漢去安在望雲知蒼梧記水辨瀛海
周遊孤光晚歷覽幽意多積雪照空谷悲風鳴森柯
歸途行欲曛佳趣尚未歇江寒早啼猿松暝已吐月
月色何悠悠清猿響啾啾辭山不忍聽揮策還孤舟

早發白帝城

一作白帝
下江陵

朝辭白帝彩雲間千里江陵一日還兩岸猿聲啼不
盡輕舟已過萬重山

一作須臾過
却萬重山

秋下荆門

霜落荆門江樹空布帆無恙挂秋風此行不爲鱸魚
膾自愛名山入剡中

江行寄遠

剗木出吳楚危檣百餘尺疾風吹片帆日暮千里隔
別時酒猶在已爲異鄉客思君不可得愁見江水碧

宿五松山下荀媪家 宣州

我宿五松下寂寥無所歡田家秋作苦鄰女夜春寒
跪進凋葫飯月光明素盤令人慙漂母三謝不能食

下涇縣陵陽溪至澁灘

澁灘鳴嘈嘈兩山足猿獠白波若卷雪側石不容舸
漁人與舟人撐折萬張篙

下陵陽沿高溪三門六刺灘

三門橫峻灘六刺走波瀾石驚虎伏起水狀龍縈盤

何慙七里瀨使我欲垂竿

夜泊黃山聞殷十四吳吟

昨夜誰爲吳會吟風生萬壑振空林龍驚不敢水中
卧猿嘯時聞巖下音我宿黃山碧溪月聽之却罷松
間琴朝來果是滄洲逸酤酒提盤飯霜粟半酣更發
江海聲客愁頓向盃中失

宿鰕湖

鷄鳴發黃山暝投鰕湖宿白雨映寒山森森似銀竹
提攜採鉞客結荷水邊沐半夜四天開星河爛人目
明晨大樓去崗隴多屈伏當與持斧翁前溪伐雲木

懷古

西施 吳越

西施越溪女出自苧羅山秀色掩今古荷花羞玉顏
浣紗弄碧水自與清波閑皓齒信難開沉吟碧雲間
勾踐徵絕艷揚蛾入吳關提攜館娃宮杳渺詎可攀
一破夫差國千秋竟不還

王右軍

右軍本清真蕭灑在風塵山陰遇羽客要此好鵝賓
掃素寫道經筆精妙入神書罷籠鵝去何曾別主人

上元夫人

上元誰夫人偏得王母嬌嵯峨二角髻餘髮散垂鬢
裘披青毛錦身著赤霜袍手提羸女兒閑與鳳吹簫

眉語兩自笑忽然隨風飄

蘇臺覽古

舊苑荒臺楊柳新菱歌春唱不勝春只今唯有江西
月曾照吳王宮裏人

越中覽古

越王勾踐破吳歸義士還家盡錦衣宮女如花滿春
殿只今唯有鷓鴣飛

商山四皓

白髮四老人昂藏南山側偃卧松雪間眞翳不可識
雲惚拂青靄石壁橫翠色龍虎方戰爭於焉自休息
秦人失金鏡漢祖昇紫極陰虹濁太陽前星遂淪匿

一行佐明兩歛起生羽翼功成身不居舒卷在曾臆
宵冥合元化茫昧信難測飛聲塞天衢萬古仰遺迹

過四皓墓

我行至商洛幽獨訪神仙園綺復安在雲蘿尚宛然
荒涼千古跡蕪沒四墳連伊昔鍊金鼎何言閉玉泉
隴寒唯有月松古漸無煙木魅風號去山精雨嘯旋
紫芝高詠罷青史舊名傳今日併如此哀哉信可憐

峴山懷古

訪古登峴首憑高眺襄中天清遠峯出水落寒沙空
弄珠見遊女醉酒一作月懷山公感歎發秋興長松鳴夜
風

自廣平乘醉走馬六十里至邯鄲登城樓覽古書懷燕趙

醉騎白花駱一作馬西走邯鄲城揚鞭動柳色寫鞚春風
生入郭登高樓山川與雲平深宮駸駸綠草一作雄都萬
事傷人情相如章華巔猛氣折秦嬴兩虎不可鬪廉
公終負荆提攜袴中兒杵臼及程嬰空孤獻白刃一作
白刃就必死耀丹誠平原三千客談笑盡豪英毛君能
穎脫二國且同盟皆為黃泉土使我涕縱橫磊磊石
子崗蕭蕭白楊聲諸賢一作賢沒此地碑版有殘銘太古
共今時由來互衰榮傷哉何足道感激仰空一作虛名趙
俗愛長劔文儒少逢迎閑從博陵一作徒遊帳飲雪朝醒

一作雪中醒歌酣易水動鼓震叢臺傾日落把燭歸凌晨向
燕京方陳五餌策一使胡塵清

蘇武

蘇武在匈奴十年持漢節白鴈上林飛空傳一書札
牧羊邊地苦落日歸心絕渴飲月窟冰飢餐天上雪
東還砂塞遠北愴河梁別泣把李陵衣相看淚成血
經下邳圯橋懷張子房淮泗

子房未虎嘯破產不為家滄海得壯士椎秦博浪沙
報韓雖不成天地皆振動潛匿遊下邳豈曰非智勇
我來圯橋上懷古欽英風唯見碧流水曾無黃石公
歎息此人去蕭條徐泗空

月夜金陵懷古金陵

蒼蒼金陵月空懸帝王州天文列宿在霸一作鼎業大江
流淶水絕馳道青松摧古丘臺傾鳩鵲觀宮沒鳳皇
樓別殿悲清暑芳園罷樂遊一聞歌玉樹蕭瑟後庭
秋一作千古不勝愁

金陵三首

晉家南渡日此地舊一作即長安地即帝王宅山為龍虎
盤一作碧宇樓臺滿青山龍虎盤金陵空壯觀天漸一作江塞淨波瀾醉客迴
橈去吳歌且自歡一作誰云行路難
地擁金陵勢城迴江漢一作水流當時百萬戶夾道起朱
樓亡國生春草離宮沒古丘空餘後湖月波上對

瀛洲

六代興亡國三杯為爾歌苑方秦地少一作山似洛
陽多古殿吳花草深宮晉綺羅併隨人事滅東逝與
一作滄波

秋夜板橋浦汎月獨酌懷謝朓

天上何所有迢迢白玉繩斜低建章闕耿耿對金陵
漢水舊如練霜江夜清澄長川瀉落月洲渚曉寒凝
獨酌板橋浦古人誰可徵玄暉難再得灑酒氣填膺

金陵新亭

金陵風景好豪士集新亭舉目山河異偏傷周顛情
四坐楚囚悲不憂社稷傾王公何慷慨千載仰雄名

過彭蠡湖尋陽

謝公入彭蠡因此遊松門余方窺石鏡兼得窮江源
前賞迹可見後來道空存而欲繼風雅豈唯清心魂
雲海方助興波濤何足論青嶂憶遙月綠蘿鳴愁猿
水碧或可採金膏祕莫言余將振衣去羽化出囂煩

入彭蠡經松門觀石鏡緬懷謝康樂題詩書

遊覽之志二篇或同或異故并錄之

謝公之彭蠡因此遊松門余方窺石鏡兼得窮江源
將欲繼風雅豈徒清心魂前賞逾所見後來道空存
況屬臨汎美而無洲渚喧漾水向東去漳流直南奔
空濛三川夕迴合千里昏青桂隱遙月綠楓鳴愁猿

水碧或可采金精祕莫論吾將學仙去冀與琴高言

廬江主人婦宿松

孔雀東飛何處棲廬江小吏仲卿妻為客裁縫石自見城烏獨宿夜空啼

陪宋中丞武昌夜飲懷古江夏

清景南樓夜風流在武昌庾公愛秋月乘興坐胡牀龍笛吟寒水天河落曉霜我心還不淺懷古一作客醉餘觴

望鸚鵡洲悲禰衡

魏帝營八極蟻觀一禰衡黃祖斗筭人殺之受惡名吳江賦鸚鵡落筆超羣英鏘鏘振金玉句句欲飛鳴

鷲鷲啄孤鳳千春傷我情五岳起方寸隱然詎可平才高竟何施寡識冒天刑至今芳洲上蘭蕙不忍生

宿巫山下巫峽

昨夜巫山下猿聲夢裏長桃花飛淥水三月下瞿塘雨色風吹去南行拂楚王高丘懷宋玉訪古一霑裳金陵白楊十字巷

白楊十字巷北夾湖溝道不見吳時人空生唐年草天地有反覆宮城盡傾倒六帝餘古丘樵蘇泣遺老

謝公亭蓋謝朓范雲之所游

謝亭離別處風景每生愁客散青天月山空碧水流池花春映日牕竹夜鳴秋今古一相接長歌懷舊遊

紀南陵題五松山一作南陵五松山感時贈別山名銅坑村五里

聖達有去就潛光愚其德魚與龍同池龍去魚不測
當時板築輩豈知傳說情一朝和一作雨殷人光氣為
列星伊尹生空桑指庖佐皇極桐宮放太甲攝政無
愧色三年帝道明委質終輔翼曠哉至人心萬古可
為則時命或大謬仲尼將一作其柰何鸞鳳忽覆巢麒
麟不來過龜山蔽魯國有斧且無柯歸去來歸去來
一作歸來宵濟越洪波歸去來

夜泊牛渚懷古此地即謝尚聞素宏詠史處

牛渚西江夜青天無片雲登舟望秋月空憶謝將軍
余亦能高詠斯人不可聞明朝挂帆席一作洞庭去楓葉落

一作紛紛

姑熟十詠

姑熟谿

愛此溪水閑乘流興無極漾楫怕鷗驚垂竿待魚食
波翻曉霞影岸疊春山色何處浣紗人紅顏未相識

丹陽湖

湖與元氣連風波浩難止天外賈客歸雲間片帆起
龜遊蓮葉上鳥宿蘆花裏少女棹輕舟歌聲逐流水

謝公宅

青山日將暝寂寞謝公宅竹裏無人聲池中虛月白
荒庭衰草徧廢井蒼苔積唯有清風閑時時起泉石

陵敲臺

曠望登古臺，臺高極人目。疊嶂列遠空，雜花間平陸。
閑雲入牕牖，野翠生松竹。欲覽碑上文，苔侵豈堪讀。

桓公井

桓公名已古，廢井曾未竭。石甃冷蒼苔，寒泉湛孤月。
秋來桐暫落，春至桃還發。路遠人罕窺，誰能見清澈。

慈姥竹

野竹攢石生，含仲映江島。翠色落波深，虛聲帶寒早。
龍吟曾未聽，鳳曲吹應好。不學蒲柳凋貞心，常自保
望夫山

寫望臨碧空，怨情感離別。江草不知愁，巖花但爭發。

雲山萬重隔，音信千里絕。春去秋復來，相思幾時歇。

牛渚磯

絕壁臨巨川，連峯勢相向。亂石流湍間，迴波自成浪。
但驚羣木秀，莫測精靈狀。更聽猿夜啼，憂心醉江上。

靈墟山

丁令辭世人，拂衣向仙路。伏鍊九丹成，方隨五雲去。
松蘿蔽幽洞，桃杏深隱處。不知曾化鶴，遼海歸幾度。

天門山

迴出江上山，雙峯自相對。岸映松色寒，石分浪花碎。
參差遠天際，縹緲晴霞外。落日舟去遙，迴首沉青靄。

李太白文集卷第二十

吳韻繆是武子甫重刊宋本

李太白文集卷第二十一

歌詩四十七首

閑適

與元丹丘方城寺談玄作

蜀中一作仙城山寺

茫茫大夢中唯我獨先覺
騰轉風火來假合作容貌
滅除昏疑盡領略入精要
澄慮觀此身因得通寂照
朗悟前後際始知金仙妙
幸逢禪居人酌玉坐相召
彼我俱若喪雲山豈殊調
清風生虛空明月見談笑
怡然青蓮宮永願恣遊眺

尋高鳳石門山中元丹丘

楚漢

尋幽無前期乘興不覺遠
蒼崖渺難涉白日忽欲晚

未窮三四山已歷千萬轉寂寂聞猿愁行行見雲收
高松上好月空谷宜清秋谿深古雪在石斷寒泉流
峯巒秀中天登眺不可盡丹丘遙相呼顧我忽而哂
遂造窮谷間始知靜者閑留歡達永夜清曉方言還
安州般若寺水閣納涼喜遇薛員外安州

魯中都東樓醉起作魯中

昨日東樓醉一作東城飲還應一作歸來倒接羅阿誰扶上馬不

省下樓時

對酒醉題屈突明府廳吳中

陶人八十日長歌歸去來故人建昌宰借問幾時迴
風落吳江雪紛紛入酒杯山翁今已醉舞袖為君開

月下獨酌四首長安

花間一作下一壺酒獨酌無相親舉盃邀明月對影成
三人月既不解飲影徒隨我身暫伴月將影行樂須
及春我歌月徘徊我舞影凌亂醒時同交歡醉後各
分散永結無情遊相期邈雲漢

天若不愛酒酒星不在天地若不愛酒地應無酒泉
天地既愛酒愛酒不愧天已聞清比聖復道濁如賢

賢聖既已飲何必求神仙三盃通大道一斗合自然
但得醉中趣勿為醒者傳

三月咸陽時一作城千花晝如錦一作好鳥吟清風落花散如錦又作園鳥

語成歌錦誰能春獨愁對此徑須飲窮通與脩短造化夙所稟一樽齊死生萬事固難審醉後失天地兀

然就孤枕不知有吾身此樂最為甚

窮愁千萬端一作千端有美酒三百杯一作數杯唯愁多酒雖

少酒傾愁不來所以知酒聖一作聖賢酒酣心自開辭粟

卧首陽一作伯夷屢空飢一作悲顏回當代不樂飲虛名

安用哉蟹螯即金夜糟丘是蓬萊且須飲美酒乘月

醉高臺

春歸終南山松龍舊隱

我來南山陽事事不異昔却尋溪中水還望巖下石
薔薇緣東窓女蘿遶北壁別來能幾日草木長數尺
且復命酒樽獨酌陶永夕

冬夜醉宿龍門覺起言志洛陽

醉來脫寶劍旅憇高堂眠中夜忽驚覺起立明燈前
開軒聊直望曉雪河冰壯哀哀歌苦寒鬱鬱獨惆悵
傅說板築臣李斯鷹犬人飈起匡社稷寧復長艱辛
而我胡為者歎息龍門下富貴未可期躬憂向誰寫
去去淚滿襟舉聲梁甫吟青雲當自致何必求知音

尋山僧不遇作金陵

石徑入丹壑松門閉青苔閑階有鳥跡禪室無人開
窺牕見白拂挂壁生塵埃使我空歎息欲去仍徘徊
香雲隔山起花雨從天來已有空樂好况聞青猿哀
了然絕世事此地方悠哉

過汪氏別業二首

遊山誰可遊子明與浮丘壘嶺礙河漢連峯橫斗牛
汪生面北阜池館清且幽我來感意氣槌魚列珍羞
掃石待歸月開池漲寒流酒酣益爽氣為樂不知秋
疇昔未識君知君好賢才隨山起館宇鑿石營池臺
大火五月中景風從南來數枝石榴發一丈荷花開
恨不當此時相過醉金罍我行值木落月苦清猿哀

永夜達五更吳餞送瓊盃酒酣欲起舞四座歌相催
日出遠海明軒車且徘徊更遊龍潭去枕石拂莓苔
待酒不至

玉壺繫青絲沽酒來何遲山花向我笑正好銜盃時
晚酌東牕下流鶯復在茲春風與醉客今日乃相宜

獨酌

春草如有意羅生玉堂陰東風吹愁來白髮坐相侵
獨酌勸孤影閑歌面芳林長松爾何知無懽本蕭瑟
為誰吟手舞石上月膝橫花間琴過此一壺外悠悠
非我心一歡本云春草變綠野新鶯有佳音落日不盡
風尋空來碧過此一壺外悠悠非我心

友人會宿

滌蕩千古愁留連百壺飲良宵宜清談皓月一作未能寢醉來卧空山天地即衾枕

春日獨酌二首

東風扇淑氣水木榮春暉白日照綠草落花散且飛孤雲還空山衆鳥各已歸彼物皆有託吾生獨無依對此石上月長歌醉芳菲

我有紫霞想緬懷滄洲間且對一壺酒澹然萬事閑橫琴倚高松把酒望遠山長空去鳥没落日孤雲還但悲光景晚宿昔成秋顏

金陵江上遇蓬池隱者時於落星石上以紫綺裘換酒爲飲

心愛名山遊身隨名山遠羅浮麻姑臺此去或未返遇君蓬池隱就我石上飯空言不成歡強笑惜日晚綠水向鴈關黃雲蔽龍山歎息兩客鳥徘徊吳越間一語一執手留連夜將久解我紫綺裘且換金陵酒酒來笑復歌興酣樂事多水影弄月色清光奈愁何明晨挂帆席離恨滿滄波

月夜聽盧子順彈琴

閑夜坐明月幽人彈素琴忽聞悲風調宛若寒松吟白雪亂纖手淥水清虛心鍾期久已歿世上無知音

青溪半夜聞笛秋浦

羌笛梅花引吳溪隴水清一作寒山秋浦月一作山滿明

月腸斷玉關情一作聲

日夕山中忽然有懷廬山

父卧名一作青山雲遂為名一作青山客山深一作春雲更好賞弄終日夕月銜樓間峯泉漱階下石素心自此得真趣非外借鼉啼桂方秋風滅籟歸寂緬思洪崖術欲往滄海一作島隔雲車來何遲撫已空歎息

夏日山中

嬾搖白羽扇裸袒青林中脫巾挂石壁露頂灑松風

山中與幽人對酌

兩人對酌山花開一盃一盃復一盃我醉欲眠卿且去明朝有意抱琴來

春日醉起言志

處世若大夢胡為勞其生所以終日醉頽然卧前楹覺來眄庭前一鳥花間鳴借問此何時春風語流鶯感之欲歎息對酒還自傾浩歌待明月曲盡已忘情

廬山東林寺夜懷

我尋青蓮宇獨往謝城關霜清東林鍾水白虎溪月天香生虛空天樂鳴不歇宴坐寂不動大千入毫髮湛然冥真心曠劫斷出沒

尋雍尊師隱居

羣峭碧磨天逍遙不記年撥雲尋古道倚樹聽流泉花暖青牛卧松高白鶴眠語來江色暮獨自下寒煙

與史郎中飲聽黃鶴樓上吹笛 江夏

一為遷客去長沙西望長安不見家黃鶴樓中吹玉
笛江城五月落梅花

對酒

勸君莫拒盃春風笑人來桃李如舊識傾花向我開
流鶯啼碧樹明月窺金壘昨來朱顏子今日白髮催
棘生石虎殿鹿走姑蘇臺自古帝王宅城闕閉黃埃
君若不飲酒昔人安在哉

醉題王漢陽廳

我似鷓鴣鳥南遷懶北飛時尋漢陽令取醉月中歸
朝王歷陽不肯飲酒歷陽

地白風色寒雪花大如手笑殺陶泉明不飲盃中酒
浪撫一張琴虛栽五株柳空負頭上巾吾於爾何有

獨坐敬亭山 宣城

衆鳥高飛盡孤雲獨去閑相看兩不厭只有敬亭山
自遣

對酒不覺暝落花盈我衣醉起步溪月鳥還人亦稀
訪戴天山道士不遇

犬吠水聲中桃花帶露濃樹深時見鹿溪午不聞鍾
野竹分青靄飛泉挂碧峯無人知所去愁倚兩三松
秋日與張少府楚城韋公藏書高齋作

日下空亭暮城荒古跡餘地形連海盡天影落江虛

舊賞人雖隔新知樂未踈
綵雲思作賦丹壁間藏書
查擁隨流葉萍開出水魚
夕來秋興滿回首意何如

懷思

秋夜獨坐懷故山

去長安後

小隱慕安石遠遊學子平
天書訪江海雲卧起咸京
入侍瑤池宴出陪玉輦行
誇胡新賦作諫獵短書成
但奉紫霄顧非邀青史名
莊周空說劍墨翟恥論兵
拙薄遂踈絕歸閑事耦耕
顧無蒼生望空愛紫芝榮
寥落暝霞色微茫舊壑情
秋山綠蘿月今夕爲誰明
憶崔郎中宗之遊南陽遺吾孔子琴撫之潛

然感舊

昔在南陽城唯餐獨山蕨
憶與崔宗之白水弄素月
時過菊潭上縱酒無休歇
況此黃金花頽然清歌發
一朝摧玉樹生死殊飄忽
留我孔子琴琴存人已沒
誰傳廣陵散但哭邙山骨
泉戶何時明長歸狐兔窟

憶東山二首

不向東山久薔薇幾度花
白雲他自散明月落誰家
我今携謝妓長嘯絕人羣
欲報東山客開關掃白雲
望月有懷

清泉映踈松不知幾千古
寒月搖輕波流光入牕戶
對此空長吟思君意何深
無因見安道興盡愁人心
對酒憶賀監二首

并序

太子賓客賀公於長安紫極宮一見余呼余為謫仙人因解金龜換酒為樂沒後對酒悵然有懷而作是

詩

四明有狂客風流霞一作賀李真長安一相見呼我謫

仙人昔好盃中物翻一作今為松下塵金龜換酒處却

憶淚沾巾

狂客歸四明山陰道士迎敕賜鏡湖水為君臺沼榮

人亡餘故宅空有荷花生念此杳如夢淒然傷我情

重憶一首

欲向江東去定將誰舉杯稽山無賀老却棹酒船回

春滯沅湘有懷山中

沅湘春色還風暖煙草綠古之傷心人於此腸斷續

子非懷沙客但美採菱曲所願歸東山寸心於此足

落日憶山中

雨後烟景綠晴天散餘霞東風隨春歸發我枝上花

花落時欲暮見此令人嗟願遊名山去學道飛丹砂

憶秋浦桃花舊遊時竄夜郎

桃花春水生白石今出沒搖蕩女蘿枝半挂青天月

不知舊行徑初峯幾枝蔽三載夜郎還於茲鍊金骨

李太白集卷第二十一

吳門繆晁武子甫重刊宋本

李太白文集卷第二十二

歌詩四十五首

感遇

越中秋懷

越水遶碧山周迴數千里乃是天鏡中分明畫相似

一本首四句云蹈海思伸連遊山下慕

康樂攀雲窮千峯弄水涉萬壑臨湍遊一作幽林一為滄波客十見紅蕖秋觀濤壯天險

望海令人愁路遐迫西照歲晚悲東流何必探禹穴

誓言將歸蓬丘不然五湖上亦可乘扁舟

效古二首

朝入天苑中謁帝蓬萊宮青山映輦道碧樹搖煙空

李三
謬題金閨籍得與銀臺通待詔奉明主抽毫頌清風
歸時落日晚躑躅浮雲駘人馬本無意飛馳自豪雄
入門紫鴛鴦金井雙梧桐清歌弦古曲美酒沽新豐
快意且為樂列筵坐羣公光景不可留生世如轉蓬
早達勝晚遇羞比垂釣翁

自古有秀色西施與東鄰蛾眉不可妬况乃効其頰
所以尹婕妤羞見邢夫人低頭不出氣塞默少精神
寄語無鹽子如君何足珍

感寓二首

寶劍雙蛟龍雪花照芙蓉精光射天地電騰不可衝
一去別金匣飛沉失相從風胡歿已久一作聖人所歿已久

以潛其鋒吳水深萬丈楚山邈千重雌雄終不隔神
物會當逢

咸陽二三月百鳥鳴花枝一作宮柳黃金枝玉劍誰家子西

秦豪俠兒一作綵憤誰家子賣珠輕薄兒日暮醉酒歸白馬驕且馳

意氣人所仰一作傾遊冶方及時子雲不曉事晚獻長

楊詞賦達身已老草玄鬢若絲投閣良可歎但為此
輩嗤

擬古十二首

青天何歷歷明星白如石黃姑與織女相去不盈尺
銀河無鵲橋非時將安適閨人理紈素遊子悲行役
瓶冰知冬寒霜露欺遠客客似秋葉飛飄飄不言歸

別後羅帶長愁寬去時衣乘月託宵夢因之寄金徽
高樓入青天下有白玉堂明月看欲墮當牕懸清光
遙夜一美人羅衣露秋霜含情弄柔瑟彈作陌上桑
弦聲何激烈風卷繞飛梁行人皆躑躅棲鳥去回翔
但寫妾意苦莫辭此曲傷願逢同心者飛作紫鴛鴦
長繩難繫日自古共悲辛黃金高北斗不惜買陽春
石火無留光還如世中人即事已如夢後來我誰身
提壺莫辭貧取酒會四鄰仙人殊恍惚未若醉中真
清都綠玉樹灼爍瑤臺春攀花弄秀色遠贈天仙人
香風送紫蘂直到扶桑津恥掇世上豔所貴心之珍
相思傳一笑聊欲示情親

今日風日好明日恐不如春風笑於人何乃愁自居
吹簫舞彩鳳酌醴餽神魚千金買一醉取樂不求餘
達士遺天地東門有二踈愚夫同瓦石有才知卷舒
無事坐悲苦塊然涸轍魚

運速天地閉胡風結飛霜百草死冬月六龍頽西荒
太白出東方彗星揚精光鴛鴦非越鳥何爲眷南翔
惟昔鷹將犬今爲侯與王得水成蛟龍爭池奪鳳皇
北斗不酌酒南箕空簸揚
世路今太行迴車竟何託萬族皆凋枯遂無少可樂
曠野多白骨幽魂共銷鑠榮貴當及時春華宜照灼
人非崑山玉安得長璀璨身沒期不朽榮名在麟閣

月色不可掃客愁不可道玉露生秋衣流螢飛百草
日月終銷毀天地同枯槁蟋蟀啼青松安見此樹老
金丹寧誤俗昧者難精討爾非千歲翁多恨去世早
飲酒入玉壺藏身以為寶

生者為過客死者為歸人天地一逆旅同悲萬古塵
月兔空擣藥扶桑已成一作薪白骨寂無言青松豈
知春前後更歎息浮榮何足珍

仙人騎綵鳳昨下閩風岑海水三清淺桃源一見尋
遺我綠玉盃兼之紫瓊琴盃以傾美酒琴以閑素心
二物非世有何論珠與金琴彈松裏風盃勸天上月
風月長相知世人何倏忽

涉江弄秋水愛此荷花鮮攀荷弄其珠蕩漾不成圓
佳期綵雲重欲贈隔遠天相思無由見悵望涼風前
去去復去去辭君還憶君漢水既殊流楚山亦此分
人生難稱意豈得長為羣越鷺喜海日燕鴻思朝雲
別久容華晚琅玕不能飯日落知天昏夢長覺道遠
望夫登高山化石竟不返

感興八首

瑤姬天帝女精彩化朝雲宛轉入夢宵無心向楚君
錦衾抱秋月綺席空蘭芬茫昧竟誰測虛傳宋玉文
洛浦有宓妃飄飄雪爭飛輕雲拂素月了可見清輝
解珮欲西走含情詎相違香塵動羅襪淥水不沾衣

陳王徒作賦神女豈同歸好色傷大雅多爲世所譏
裂素持作書將寄萬里懷眷眷待遠信竟歲無人來
征鴻務從陽又不爲我棲委之在深篋塵魚壞其題
何如投火中流落他人開不惜他人開但恐生是非
芙蓉嬌綠波桃李誇白日偶蒙春風榮生此豔陽質
豈無佳人色但恐花不實宛轉龍火飛零落互相失
詎知凌寒松千載長守一

十五遊神仙仙遊未曾歇吹笙吟松風汎瑟窺海月
西山玉童子使我鍊金骨欲逐黃鶴飛相呼向蓬關
西國有美女結樓青雲端蛾眉豔曉月一笑傾城歡
高節奪明主炯心如凝丹常恐彩色晚不爲人所觀

安得配君子共成雙飛鸞

竭來荆山客誰爲珉玉分良寶絕見弃虛持三獻君
直木忌先伐芬蘭哀自焚盈滿天所損沉冥道所羣
東海有碧水西山多白雲魯連及夷齊可以躡清芬
嘉穀隱豐草草深苗且稀農夫既不異孤穗將安歸
常恐委疇隴忽與秋蓬飛烏得薦宗廟爲君生光輝

寓言三首

周公負斧宸成王何夔夔武王昔不豫剪爪投河湄
賢聖遇讒慝不免人君疑天風拔大木禾黍咸傷萎
管蔡扇蒼蠅公賦鴟鴞詩金滕若不啓忠信誰明之
遙裔雙綵鳳婉孌三青禽往還瑤臺裏鳴舞玉山岑

以歡秦娥意復得王母心驅驅精衛鳥銜木空哀吟
長安春色歸先入青門道綠楊不自持從風欲傾倒
海鷺還秦宮雙飛入簾櫳相思不可見託夢遼城東

秋夕旅懷

涼風度秋海吹我鄉思飛連山去無際流水何時歸
日夕浮雲色心斷明月暉芳草歇柔艷白露催寒衣
夢長銀漢落覺罷天星稀含歎想舊國泣下誰能揮

感遇四首

吾愛王子晉得道伊洛濱金骨既不毀玉顏長自春
可憐浮丘公猗靡與情親舉手白日間分明謝時人
二仙去已遠夢想空殷勤

可歎東籬菊莖踈葉且微雖言異蘭蕙亦自有芳菲
未汎盈樽酒徒沾清露輝當榮君不採飄落欲何依
昔余聞常娥竊藥駐雲髮不自嬌玉顏方希鍊金骨
飛去身莫返含笑坐明月紫宮誇蛾眉隨手會凋歇
宋玉事楚王立身本高潔巫山賦綵雲郢路歌白雪
舉國莫能和巴人皆卷舌一惑登徒言恩情遂中絕

寫懷

翰林讀書言懷呈集賢院內諸學士

長安

晨趨紫禁中夕待金門詔觀書散遺帙探古窮至妙
片言苟會心掩卷忽而笑青蠅易相點白雪難同調
本是踈散人屢貽褊促謂雲天屬清朗林壑憶遊眺

或時清風來閑倚欄一作下嘯巖光桐廬溪謝客臨海
嶠功成謝人君一作從此一投釣

尋陽紫極宮感秋作

何處聞秋聲脩脩北牕竹迴薄萬古心攬之不盈掬
靜坐觀衆妙浩然媚幽獨白雲南山來就我簷下宿
嬾從唐生決蓋訪季主卜四十九年非一往不可復
野情轉蕭散世道有翻覆陶令歸去來田家酒應熟

江上秋懷

餐霞卧舊壑散髮謝遠遊山蟬號枯桑始復知天秋
朔鴈別海裔越鷺辭江樓颯颯風卷沙茫茫霧縈洲
黃雲結暮色白水揚寒流惻愴心自悲潺湲淚難收

蘅蘭方蕭瑟長歎令人愁

秋夕書懷一作秋日南遊書懷

北風吹海鴈南度落寒聲感此蕭湘客悽其流浪情
海懷結滄洲一作遠心霞一作想遙一作赤城始探蓬壺
事一作蓬壺術採旋覺天地輕澹然吟一作高秋閑卧瞻太
清蘿月掩一作空幕松霜皓一作散前楹滅見息羣動獵
微窮至精桃花有源水可以保吾生

避地司空原言懷舒州

南風昔不競豪聖思經綸劉琨與祖逖起舞鷄鳴晨
雖有匡濟心終為樂禍人我則異於是潛光皖水濱
卜築司空原北將天柱鄰雪霽萬里月雲開九江春

侯乎太階平然後託微身領家事金鼎年兒何長新
听願得此道終然保清真弄景奔日馭攀星戲河津
一隨王喬去長年王天賓

南奔書懷

一作自丹陽
南奔道中作

遙夜何漫漫一作何空歌白石爛竊戚未匡齊陳平終
佐漢櫓槍掃河洛直割鴻溝半歷數方未遷雲雷屢
一作多難天人乘旄鉞虎竹光藩翰侍筆黃金臺傳觴
青玉案不因秋風起自有思歸歎主將動讒疑王師
忽離叛自來白沙上一作海鼓噪丹陽岸賓御如
浮雲從風各消散舟中拍可掬城上骸爭爨草草出
近關行行昧前筭南奔劇星火北寇無涯畔顧乏七

寶鞭留連道邊翫太白夜食昂長虹日中貫秦趙與
天兵茫茫九州亂感遇一作明主恩頗高祖述言過江
誓流水志在清中原拔劍擊前柱悲歌難重論

上崔相百憂章

四言時在
尋陽獄

共工赫怒天維中摧鯤鯨噴蕩揚濤起雷魚龍陷人
成此禍胎火焚昆山玉石相碰仰希霖雨灑寶炎煨
箭發石開戈揮日迴鄒衍慟哭燕霜颯來微誠不感
猶執一作繫夏臺蒼鷹搏攫丹棘崔嵬豪聖凋枯玉風傷
哀斯文未喪東岳豈頽穆逃楚難鄒脫吳災見機苦
遲二公所哈驥不驟進麟何來哉星離一門草擲二
孩萬憤結緝一作憂從中催金瑟玉壺盡為愁媒舉酒

大息泣血盈盃台星再朗天網重恢屈法申恩弃瑕
取材治長非罪尼父無猜覆盆儻舉應照寒灰

萬憤詞投魏郎中

海水渤潏人罹鯨鯢蒹葭胡沙而四塞始滔天於燕齊
何六龍之浩蕩遷白日於秦西九土星分嗷嗷悽悽
南冠君子呼天而啼戀高堂而掩泣淚血地而成泥
獄戶春而不草獨幽怨而沉迷兄九江兮弟三峽悲
羽化之難齊穆陵關北愁愛子豫章天南隔老妻一
門骨肉散百草遇難不復相提攜樹榛拔桂囚鸞寵
雞舜昔授禹伯成耕犁德自此衰吾將安栖好我者
恤我不好我者何忍臨危而相擠子胥鳴夷彭越醢

醢自古豪烈胡為此繫蒼蒼之天高乎視低如其聽
卑脫我牢狴儻辨璞王君收白珪

荊州賊亂臨洞庭言懷作

脩蛇橫洞庭吞象臨江島積骨成巴陵遺言聞楚老
水窮三苗國地窄三湘道歲晏天崢嶸時危人枯槁
思歸阻喪亂去國傷懷抱郢路方丘墟章華亦傾倒
風悲猿嘯苦木落鴻飛早日隱西赤沙月明東城草
關河望已絕氛霧行當掃長叫天可聞吾將問蒼昊

覽鏡書懷

得道無古今失道還衰老自笑鏡中人白髮如霜草
捫心空歎息問影何枯槁桃李竟何言終成南山皓

田園言懷

賈誼三年謫班超萬里侯何如牽白犢飲水對清流

江南春懷

青春幾何時黃鳥鳴不歇天涯失鄉歸路江外若華
鬢心飛秦塞雲影滯楚關月身世殊爛漫田園久蕪
沒歲晏何所從長歌謝金闕

李太白文集卷第二十二

吳門繆昌武子甫重刊宋本

